

古浪方志

(顺治、乾隆版)

古浪县县志编纂办公室 编

目 录

凉镇志 古浪所志

地里志	3
沿 革	3
疆 里	3
山 川	4
水利（附桥梁）	4
风 俗	5
古 迹	5
建置志	6
城 垣	6
公 署	7
坛 址	7
祠 祀（附寺观）	8
驿 传（附铺舍）	9
官师志	10
名 宦	10
道 属（附员额）	10
兵防志	12
军 制（附马匹）	12
堡 寨	13
烽 墩	14
隘 口	18

戎器	19
岁计志	22
户口	22
地粮	22
马粮	23
课税	23
支放	23
人物志	25
贞节	25

五凉考治六德集全志
第四卷 义集 古浪县志

《五凉考治六德集全志》序	29
《五凉考治六德集全志》序	31
地里志	35
星野	35
沿革	35
古浪县疆域图说	36
里至	38
山川	38
村社	41
社仓(附)	43
户口	44
保甲	44
田亩	45
赋则	45
俸薪等(附)	46
物产	47
古浪水利图说	51

渠坝水利碑文·····	53
水利碑文说·····	57
山田坝（附）·····	57
井（附）·····	58
泉（附）·····	58
桥 梁（附）·····	59
古 迹（附丘墓）·····	59
祥 异·····	61
建置志 ·····	62
城 郭·····	62
公 署·····	62
坛 壝·····	63
学 校·····	64
驿 传·····	65
寺 观·····	66
风俗志 ·····	70
士、农、工、商执业·····	70
婚姻、祭祀、丧葬、宾师、岁时、伏腊、礼仪·····	70
番夷回类（附）·····	71
仙 释（附）·····	73
官师志 ·····	74
秩 官·····	74
知 县·····	74
训 导·····	75
典 吏·····	75
守御所·····	76
大靖参将·····	77
大靖守备·····	79
土门守备·····	80

安远守备	81
都 司	81
古浪守备	82
把 总	82
黑松把总	83
名 宦	83
兵防志	85
营 堡	85
关 隘	86
烽 墩	88
军 制	91
粮 饷	93
人物志	95
乡 贤	95
忠 孝	96
节 义	97
选 举	98
流 寓	100
文艺志	101
奏 议	101
碑 记	107
诗 歌	115
后 记	131

凉镇志 古浪所志

清·顺治丁酉岁暮春 苏铎 撰

地里志

沿革

古浪所汉为武威郡地，东汉、魏、晋、隋俱因之。唐嗣圣十八年，郭元振为凉州都督，始于武威东南境石峡筑和戎城。五代仍属凉州。宋为西夏元昊所据。元灭夏属西凉州，至元元年立庄浪县，乃于和戎城立巡检司，属永昌路。元末兵乱，居人逃散。明洪武五年，宋国公冯胜平定河西，九年开设凉州卫，十年本卫千户江亨守御，因旧水名改为古浪。十二年属庄浪卫，为屯守之所。

正统三年巡抚都御史罗亨信奏设古浪守御千户所。我清朝因之。

疆里

古浪所疆域，东至扒沙，西连武威，南界黄河，北抵暖泉，广三百四十里，袤五百二十里。里至：东至庄浪卫二百一十里，西至凉州卫一百三十里，南至黄河四百七十里，北至暖泉、哨马营五十里，东北至马莲滩三百四十里，西北至镇番卫三百四十里，东南至黑川二百里，西南至巴州五百四十

里。

山 川

古浪所南枕乌鞘岭，西连高崖泉，古浪流绕关城险隘（旧志）。东山，城东二里。西山，即古雪山，在城西四十五里。柏林山，城南七十五里，山多松。黑松林山，城东四十五里，山多松。黄羊川山，城东南五十里。古浪河，城南八十里，其源出分水岭，引渠灌田。高崖泉，城西二里，水自崖下涌出，流于西南，湍激可用转磨溉田。鸳鸯池，城南七十里，池水四时不涸。甘酒石，城南入峡十五里道左，有石与两山趾脉弗连，屹立突起，如崇台巨屋，居人酿酸者，削片石炽，投酒中，即变佳酝，因名酸酒石。余曰：酸者酸在酒也。因石而甘，是甘者石之功也，乃更名甘酒石。

水利(附桥梁)

古浪所板槽渠，城西三里，自本渠改挑沟二处。

暖泉渠，城西三里。

长流渠，城南三十五里。

大河头坝渠，城东南三十里。

二坝渠，城北四里。

三坝渠，城北四十里。

四坝渠，城北三十里。

西山渠，城西三十里。

以上渠坝，俱引水灌田。

酸茨直沟，城东南一百里，从峡山水涌出泉，引入大靖川灌田资民。

暖泉桥，城南郭外。

通津桥，城东郭内。

风 俗

古浪所，土磽风寒，人性刚勇，以骑射为能；以孳牧为业。野处岩居，不拘礼法，皆元之故俗。今则变易，设屯耕稼，奠厥攸居，奔走服役，悉为编户，相生相养，礼义日生，婚姻丧葬，更相资助，熙然有华夏之风焉。（新志）

古 迹

古浪所和戎城，即今所治是也。

和戎巡检司，元世祖至元元年于和戎城立巡检司。

建置志

城垣

大靖城堡，稽历代沿革无所考镜。明洪武中略定河西，复旧疆界。按：名扒沙，传之故老，云凉州古屯种处，后嘉隆时，有套鲁阿赤兔等假款为名，住牧窃据，邀途穿塞，劫掠番民，日与兵争，肆螫不已。万历二十六年，巡抚甘肃兵部尚书田乐、总兵达云、分守凉州参议张蒲，谋谐文武，带甲万人，运筹出奇，扫空穴幕，恢复其地，改名大靖，议设参将御防。

我清朝定鼎边备，稍缓无虞，城垣旧迹只有东北二面土墙。万历二十七年三月内，就此展筑，计周围四百八丈，高三丈九尺，厚二丈三尺，开西南北三门，启楼三座。又靖城高埠，难以穿井。水离城南五里许，民修水槽，从外引入，俱是水井盛聚，军民资饮，每言不敷。如遇困兵，失源大为不便。

古浪所即古和戎城，周二里七十五步，高二丈五尺，厚二丈，东南门各一，逻铺十，角楼二。东南依山，无池，西北池深二丈五尺，阔二丈四尺。

土门堡一座。周围二百二十丈，厚二丈，高三丈六尺，开城门二座。

安远堡一座，周围四十丈，厚一丈，高三丈五尺，开城门二座。

黑松堡一座，周围三百二十二丈，厚二丈，高三丈，开城门二座。

公署

大靖察院，明万历二十七年建。

参将府，明万历二十七年建。

监收县丞厅，明万历二十九年建。

仓，明万历二十九年建。

场，明万历二十九年建。

古浪所察院，城东北隅。

守备厅，察院右。

古浪所守御千户总所，内附吏目厅，在城北隅，今倾圮存址。

丰盈仓，城西南隅。

草场，城南隅。

演武场，城北二里。

坛址

古浪所社稷坛，城西南一里。

风云雷电山川坛，城南一里。

历坛，城西北一里。

祠 祀(附寺观)

古浪所城隍庙，城东北隅。

旗纛庙，城西北隅。

雷神庙，城南。

三官庙，城东隅。

忠节祠，城中，祀明阵亡千户王经、张威，百户王朝、陈泰、徐敏、赵祥。

北极宫，城外古峰山顶。

玄真观，城南郭。

观音堂，城北郭，即元之永寿寺，元季兵燹，明洪武十九年重修。

大靖城内庙寺：

真武庙，明万历四十四年建。

关帝庙，明天启元年建。

东岳庙，明崇祯四年建。

城隍庙，明崇祯十三年建。

马神庙，明万历四十四年建。

娘娘庙，明天启六年建。

龙王庙，城南五里。水源，修渠引入城，以资军民食用最虞困兵决源。

寿国寺，明万历三十四年建。

三教堂，顺治八年建。

白衣寺，顺治九年建。

驿 传(附铺舍)

古浪所，明制领驿二，每驿各额军六十名，马骡六十匹头。递运所三，每所各额夫五十我，牛车四十只辆。

清朝，制定古浪、黑松、安远三驿所，每处额设军五十名，其马匹牛车俱无定额。

古浪在城驿，军三十名，见在马骡三十三匹头。

古浪在城递运所，夫二十名，见在牛车一十五只辆。

黑松林驿，城南三十里，军三十名，见在马三十七匹头。

黑松林递运所，在本驿堡内，夫二十名，见在牛车一十五只辆。

安远堡，经制驿夫五十名，因地苦，是物不产，难以安马，呈祥留所夫二十七名，见在牛车一十只辆，其余二十三名，议拨双塔，以均递运。

在城铺，城北关。

黄羊川铺，城南一十五里。

永宁铺，去黄羊川一十五里。

黑松林铺，去永宁铺二十里。

安远铺，去黑松林铺二十里。

官师志

名宦

古浪所，唐，郭元震，凉州都督，筑和戎城，即古浪。前见凉州。

明，江亨，洪武十年任凉州千户，防守古浪，缮城阵创驿传，始为庄浪街屯守住所。

道属(附员额)

大靖参将王述宗，原籍北(平)直隶人。

胡有赏，原籍满族人。

祁兴周，原籍西宁州土司官。

卢拱极，原籍辽东永平人。

周成功，辽东人。

大靖营，中军守备一员，千总一员，把总二员。

土门堡，守备一员。

古浪堡，守备一员。

安远堡，守备一员。

黑松堡，防守一员。

古浪守御千总所，专城千总一员，丰盈仓大使一员，所吏目一员。大靖仓监收县丞一员，在城古浪驿驿丞一员，城南黑松驿驿丞一员，安远所驿丞一员。

兵防志

军制(附马匹)

大靖营：

明，额马兵三百二十二名，守兵一千三百四十七名，在营马四百二十一匹。我清朝制定马战兵二百名，步战兵一百名，步守兵四百名，营马二百匹，官骑自备战马一十六匹。

土门堡：

明，额马兵四十名，守兵三百一十名，在堡马四十九匹。我清朝制定步守兵一百四十名，官骑自备战坐马四匹。

古浪堡：

明，额马兵二十名，守兵一百三十四名，在堡马二十匹。我清朝制定步守兵一百一十名，官骑自备战坐马四匹。

安远堡：

明，额马兵五十名，守兵二百一十七名，在堡马五十一匹。我清朝制定

步守兵一百四十名，官骑自备战坐马四匹。

黑松堡：

额马兵六十名，守兵一百二十八名，在堡马六十三匹。我清朝制定步守兵七十名。

堡 寨

古浪所所属堡寨：

安远堡，城南六十里，

泗水堡，城南三十里。

黑松堡，城北四十里。

西川堡，城西三十里。

土门堡，城东北六十里。

永丰堡，城北六十里。

夹山堡，城东北八十里。

大靖城堡，城东北一百二十里。

大佛寺堡，城西五十里。

小桥堡，城北三十里。

定宁寨，城东北三十里。

沙沟寨，城西三十里。

黄羊川古城寨，城西（东）六十里。

扒沙寨，城东北一百一十五里。

烽 墩

大靖营参将所辖境内，沿边烽墩一十三座，安设守瞭兵二十六名：

靖字一墩，离城二十五里。（注：靖即大靖）

靖字二墩，离城二十里。

靖字三墩，离城一十五里。

靖字四墩，离城十里。

靖字五墩，离城五里。

靖字六墩，离城五里。

靖字七墩，离城一十里。

靖字八墩，离城二十里。

靖字九墩，离城二十五里。

靖字十墩，离城三十里。

靖字十一墩，离城三十五里。

石碑湾墩，离城四十里。

崖头墩，离城四十五里。

境外冲墩二座，安设守瞭兵四名：靖鲁墩，离城三十五里；干涉池墩，离城三十五里。

土门堡境内沿边烽墩一十九座，安设守瞭兵三十八名：

夹字关王庙墩，离堡四十里。（注：夹即夹山岭堡）

土字界版墩，离堡三里里。

土字驼山岭墩，离堡二十里。

土字分水岭墩，离堡一十里。

土字长岭墩，离堡八里。

土字沙沟墩，离堡七里。

土字车路沟墩，离堡六里。

土字新墩，离堡五里。

土字青石崖墩，离堡一十五里。

二墩，离堡一十里。

永字一墩，离堡一十里。（注：永即永丰堡）

永字二墩，离堡二十里。

永字干河墩，离堡二十五里。

泗字干河墩，离堡三十里。（注：泗即泗水堡）

泗字二墩，离堡三十五里。

泗字三墩，离堡三十五里。

靖字一墩，离堡四十里。（注：靖指靖边驿）

靖字二墩，离堡五十里。

本堡墩。

古浪堡境内沿边大路烽墩五座，安设守瞭兵一十名：

南五里墩，离堡五里。

太平墩，离堡八里。

二沟墩，离堡一十里。

新关墩，离堡一十二里。

界碑墩，离堡一十五里。

迤北大路烽墩一十三座，安设守瞭兵二十六名：

北五里墩，离堡五里。

八里营墩，离堡八里。

杨家桥墩，离堡一十五里。

小桥铺墩，离堡一十五里。

样（漾）沟墩，离堡二十里。

南花腰墩，离堡二十五里。

双塔南五里墩，离堡三十里。

北花腰墩，离堡三十五里。

崖头墩，离堡三十二里。

镇彝（夷）墩，离堡三十五里。

阎家腰墩，离堡三十八里。

阎家铺墩，离堡四十里。

迤东沿边烽墩六座，安设守瞭兵一十二名：

靖字三墩，离堡六十里。（注：靖指靖边驿）

靖字四墩，离堡六十五里。

靖字五墩，离堡七十里。

靖字六墩，离堡七十五里。

靖字七墩，离堡八十里。

土塔墩，离堡五十里。

境外冲墩五座，安设守瞭兵一十名：

西山墩，离堡二十里。

红岭墩，离堡三十里。

石关墩，离堡三十八里。

红岷墩，离堡六十里。

慢坡墩，离堡八十里。

黑松堡境内南北大路烽墩一十座，安设守瞭兵一十名：

龙沟墩，离堡一十五里。

新墩湾墩，离堡一十里。

大坡墩，离堡八里。

板桥墩，离堡五里。

番沟墩，离堡三里。

火烧岔墩，离堡三里。

香筒坡墩，离堡五里。

黄羊川墩，离堡八里。

岔路墩，离堡一十里。

界牌墩，离堡一十五里。

境外冲墩六座，安设守瞭兵一十二名：

石庙儿墩，离堡一十里。

马莲洼墩，离本堡五里。

瞭高山墩，离本堡五里。

王家坟墩，离本堡八里。

龙沟榻墩，离堡一十五里。

油炸墩，离堡一十五里。

安远堡境内南北大路烽墩三座，安设守瞭兵三名：

流水沟墩，离堡五里。

飘儿沟墩，离堡一十里。

在城墩境内，临山烽墩八座，安设守瞭兵八名：

尖山墩，离堡一十五里。

空心墩，离堡一十里。

称仁坡墩，离堡五里。

芥菜坡墩，离堡五里。

塌墩子墩，离堡一十里。

坟湾墩，离堡一十二里。

长山墩，离本堡一十二里。

大沙沟墩，离堡一十五里。

境外冲墩二座，安设守瞭兵四名：

可可墩，离堡三十里。

红沟儿墩，离堡六十里。

隘 口

大靖营参将所辖沿边水柞八处，安设守哨兵八名：

靖字一墩柞，离城二十五里。

靖字四墩柞，离城一十里。

靖字六墩柞，离城五里。

靖字七墩柞，离城一十里。

靖字八墩柞，离城二十里。

靖字九墩柞，离城二十五里。

靖字十一墩柞，离城三十五里。

崖头墩柞，离城四十五里。

境外隘口六处，安设守哨兵一十二名：

酸茨沟口，离城四十里。

石刺碑口，离城八里。

张兴寨口，离城一十五里。

赵家砬口，离城二十里。

庄浪沟口，离城三十三里。

大山顶，离城二十五里。

土门堡境外隘口二处，安设守哨兵四名：

鹅头山，离堡五十里。

黄花儿滩，离堡五十里。

古浪堡境外隘口要柞三处，安设深哨兵八名：

冰沟口，离堡一十里。

樊家口，离堡一十五里。

哈西柞口，离堡一百五里。

黑松堡境外隘口要柞六处，安设深哨兵二十名：

倒坡河口，离堡二十五里。

青石崖口，离堡二十里。

湖滩洼口，离堡二十五里。

九池子口，离堡一十五里。

牛头洼柞，离堡二十五里。

龙沟柞，离堡一十二里。

戎 器

古浪所派办西安府七分熟铁二千二百一十二斤八两。

钢铁一十七斤八两。

白锡五斤一十二两。

水胶七斤一十两。

心红一斤八两。

无名异一斤两。

黄丝三斤一十四两四钱。

黄蜡二斤。

麻皮一斤。

丝线八两。

黄丹一十一斤四两。

烟煤一斤八两。

官粉一斤二两。

蜜陀僧一斤二两。

红铜二两。

硼砂六钱。

藤黄一两七钱。

雌黄二两一钱。

牛筋一十五斤一十二两。

鱼鳔一十一斤八两。

牛角弓面八十片。

生漆六斤四两。

清油七两六钱。

桐油二十七斤。

猪油三十斤。

青布四十二丈八尺。

白布八十五丈六尺。

鹅翎三千六百枚。

麻布一十四丈六尺。

本所，三分牛皮四十张。

羊粉皮三十二张。

弓胎木八十块。

箭杆一千二百枝。

长枪杆四十条。

銃箭四百枚。

造额：每岁按季造盔四十顶，甲四十副，刀四十把，弓四十张，弦八十条，撒袋四十副，銃箭四百枝，箭一千二百枝，长枪四十条。

以上岁造军器物料，废自明时，今无。

岁计志

户 口

古浪所，明，正统中，户一千二百二十，口三千二十六。嘉靖中，户三百一十，口六百七十一。

地 粮

古浪所顺治二年，额征屯地三千九百三十六顷九十五亩一分四厘。
粮，七千三百三石七斗六升五合四勺。
旧例草七万三千三十七束六分五厘四毫。

内豁免抛荒地八百八十五顷二十二亩八分一厘。
粮一千六百三十二石七斗七升八合九勺。
草一万六千三百二十七束七分八厘九毫。
陆续劝民新垦过地二百五十五顷六亩八分七厘。

粮三百九十七石五斗九升九合五勺。

草三千九百七十五束九分九厘五毫。

十四年，实征地三千三百六顷七十九亩二分。

粮六千六十八石五斗八升六合，每石外随征马料五升。

草六万六百八十五束八分六厘。

马 粮

古浪所顺治十四年随屯科垦粮，每石外征五升，额马粮三百三石四斗二升九合三勺。

课 税

古浪所顺治十三年，额征油磨课银七十两八钱。

当税银五两。

岁无定额畜税银三十一两六钱三分四厘。

地税银六两六分一厘五毫。

支 放

大靖营马步战守兵粮饷，每岁本折兼支本色粮五千七百石，折色银五千

七百两。

土门堡守兵粮饷，每岁本折兼支本色粮八百四十石，折色银八百四十两。

安远堡守兵粮饷，每岁本折兼支本色粮六百六十石，折色银六百六十两。

黑松堡守兵粮饷，每岁本折兼支本色粮四百二十石，折色银四百二十两。

大靖营，营坐马岁支春冬料一千一百六十六石四斗，新例草七万七千七百六十束，夏秋乾银六百四十八两。

土门堡，官坐马岁支春冬料二十一石六斗，新例草一千四百四十束，夏秋乾银一十二两。

古浪堡，官坐马岁支春冬料二十一石六斗，新例草一千四百四十束，夏秋乾银一十二两。

安远堡，官坐马岁支春冬料二十一石六斗，新例草一千四百四十束，夏秋乾银一十二两。

人物志

贞 节

大靖杜氏，古浪所生员郭宗尧妻，夫被贼难，抚孤成立，不绝继祀，贞纯流芳，呈请旌奖。

五凉考治六德集全志
第四卷 义集 古浪县志

张昭美 总修

《五凉考治六德集全志》序

五凉考治集，志五凉也。不直曰志，而曰考治，何也？志仿于《禹贡》，详于《周礼·职方氏》，皆圣人致治之书也。后人因之，体固不一。如辛氏之《三秦记》，常璩之《华阳国志》，以及洛阳伽蓝、建康宫殿、襄阳耆旧、汝南先贤，下至十洲洞宾、真腊佛国之类，皆志也，而不尽为治志。

五凉之志，为考治也，故不直曰志，而曰考治集也。治道果在志乎？曰：昔子朱子知南康军首，按图经察民疾苦，风俗登耗，士习衰弊之由，古之人有行之者，志固足以考治也。曰：五凉之志前此矣，不曰考治，今曰考治，何也？曰：五凉地界西戎，先王声教之不及。自汉遣博望通月支，始有中国人迹。后骠骑将军破匈奴，西域浑邪以其众降。而太初间始置居延、休屠以卫酒泉。然自晋、魏以往，分崩割据，僭窃无常。至于李唐、赵宋之季，遂陷入吐蕃、元昊，不列冠带，垂千百年。此其人物器竞，风俗颓弊，不可为治固矣。明混一统宇，列在藩卫，而天骄行城，岁逐水草，秋高马肥，雪劲弓鸣，岌岌乎戎马之未遑，亦无暇政教为也，此旧志之所以不足为考治也。今国家列圣相承，德威远播，贺兰之北，青海之西，豪酋面缚，戎人稽颡，盖殷遥数千万里，靡不岁时享王，作藩称臣于圣人之世；而沮渠蒙逊、秃发乌孤之故地，遂与中牟、颍川同会风雨之和。世庙三年，升卫所为府县。官职举修，兵防整好，洗山川之沉湮，登荒徼于衽席；水泉疏衍，草木黄茂，士女绥其既庶以富，而农桑礼乐之图，人心风俗之计，所谓安之于不扰之乡，裕之于不匮之府，道之于不争之方，和之于不乖之制者，必当酌古准今，以成万年之盛治。此治斋先生所为网罗放纷，集思广益，而有考治之书也。曰：治道尽于此志乎？曰：志志也。《仪礼·大射仪》云：不以乐志。郑康成注：以志为意所拟度；而引左氏《春秋传》：吾志其目以明之；又《尚书·盘庚》云：“予告汝于难，若射之有志。”《孔传》：以射有准，志

必中，所志乃善。然则志之为义如斯而止。

治斋之监司五凉四年矣。其于山川疆域，建置因革，风尚贞淫，物土之宜，流泉之利，人情之取舍憎恶，刑政之允孚，兵制之失得，莫不以意拟度，而得其准的之所在。用是为之志，以为后人准。后之君子中者巧也，至者力也，非人之所能齐也。若舍彼有的以为智巧，是犹匠氏徧规矩为方圆，而越和之药不按人肥瘠也。虽在羿由不能善其发矣，此考治之不得不于志也。然则《学道编》之于义例，何也？曰：射之为教，引而不发，示之鹄斯已矣。

治斋则以为，吾示之鹄，而教之射，持弓矢审，固盖有道焉！本之以诚敬，贯之以性道，敷之以训言，如是而考治之法，乃《禹贡》之书，归于祗慎；《周礼》之作，原本睢麟，此物此志也。

年家眷寅弟顾济美顿首拜撰。

《五凉考治六德集全志》序

誌者，志也。例起于班史，后之誌郡国者，沿而加详焉耳。前乎此者，有誌乎？曰：有。周官小史氏掌邦国之志，记其境土遐迩，山川险易，与其民物之丰耗、赋役之下上，以及国典官方、土宜人情为一书，以诏王施邦国而出治焉。故曰“民之所欲，因而欲之；俗之所恶，顺而弃之。”“自乡遂暨郊畿百千里外上之人，若入其家而代为理也；若隐知其疾痛痾痒，为之抚摩搔抑而去之也。政行而不口弗 乎俗，功成而不愆于素。”由是观之，志之体虽古史之支流余裔，精其义仿佛《周官》六典之遗意焉，可易言也哉。

凉州，河西要区，土衍而俗茂。金台张治斋先生观察是邦，凡所以课吏训士若民者，旬有会，月有要，岁有成。以一身先之，历五寒暑如一日，治其境如奥然。先生之学，本于敬明恕而行之。故其为政也，委曲详密，而序次犁然，可层累以稽。其为言也，不憚丁宁，反复而恳恻，具有条理。余观先生《天山学道编》，根心以修词，因词以核事。吏斯土者，师而行之有余矣。先生犹惧旧乘缺略，无以考治。爰率其僚辑郡志，凡七篇，因以己学道之编殿焉。嗟夫！道与治岂有二耶？守先生之道以治凉，虽五凉志无作可也。而志以考治，治以行道。斯地，而有斯志也，实始于先生。何则顺时而立功，而不易其宜；因地以播政，而不易其俗。道与治，惟先生为能一之矣。又况凉郡，介祁连翰海之间，控引乎酒泉朔方，天所以招徕西北也。戎菽荐居，亭障相望，其于大荒穷漠，深阻扼塞，尤当披图而后知，按籍而后理。后之有地治之官，与夫观风奉使来过是都者，非五凉志之考焉考哉。故于先生之属也，敬诺而为之序。书六册以六德称者，私有请于先生。斯集也，不惟古史之法，殆诏来者，以地官司徒保民之遗也耶。

时乾隆十四年八月既望，清溪官献瑶拜序。

鉴 定

凉庄道 张之浚 〔字〕治斋，顺天大兴人，庚戌进士。

升任凉州府 文绶 〔字〕惺亭，满洲镶白旗人，内阁中书。

凉州府 何德新 〔字〕西岚，贵州开州人，乙丑进士，翰林院检讨。

原任凉州理事同知 苏尔弼 〔字〕西泉，满洲正白旗人。

凉州理事同知 傅显 〔字〕令宜，满洲镶红旗繙绎举人。

原任庄浪同知 梅士仁 〔字〕静函，广东顺德人。

庄浪同知 柏超 〔字〕云□，正黄旗汉军。

庄浪理事通判 肃普洞阿 〔字〕鉴亭，满洲镶白旗人。

调任柳林湖通判 刘炆 〔字〕芸亭，河南祥符县举人。

柳林湖通判 姚当 〔字〕肩宇，镶红旗汉军。

前任古浪县知县 徐思靖 〔字〕哲次，江南荆溪县举人。

古浪县知县 蔡青钱 〔字〕泉亭，广东海阳县举人。

总 修

广东雷琼道 张珧美 〔字〕昆岩，武威廪生保举。

纂修

丙午邑举人 赵璘〔字〕文璧。

邑贡生 金煥〔字〕宸蔚。

邑监生 李天榆〔字〕帝升。

邑廩生 郭建文〔字〕开运。

监修

凉州府教授 张光宗〔字〕谦益，陕西咸宁县举人。

凉州府训导 傅梦弼〔字〕代予，陕西临潼县人。

武威县教谕 刘以璋〔字〕凤岗，陕西周至县人。

古浪县训导 刘庆昌 陕西渭南县人。

校 阅

邑廩生 穆攀玑 〔字〕配衡。

邑廩生 李天育 〔字〕致和。

邑廩生 李世蕢 〔字〕蕴香。

监 刊

武威县典史 李楷 〔字〕柱四，浙江会稽人。

地里志

星 野

古浪隶属雍州之地，居武威之左。《天文志》雍州井鬼分野。又云，凉州入箕，武威入璧，古浪星野与武威同占。

沿 革

古浪县汉属武威郡地，东汉、魏晋俱因之。东晋张氏都凉，分汉六郡为二十二郡。后四凉迭兴，割据河西，古浪之地无所稽考。至唐嗣圣十八年，凉州都督郭元振，始于武威东南筑和戎城，定边界，设烽堠，扒沙之地犹为夷攘，未入版图。五代相沿，宋为西夏元昊所据。元灭夏，命皇子阔端镇之。至元元年，和戎城设巡检司，属永昌路。后降西凉府为州隶，设宣慰使司，和戎之所隶不闻焉。元末兵乱，居人逃散，和戎境虚。明洪武五年，宋国公冯胜平定，复设凉州。套房闻风远遁，仿充国遗策于扒里扒沙、暖泉、哨马营等处，且屯且耕以拓土地。九年，以兰州等卫官军守御凉州，设五所，改和戎巡检司。十年，本卫千户江亨因旧水名改为古浪，筑城于今治

所。十二年，属庄浪卫，为屯守之所。正统三年，巡抚都御史罗亨信奏设古浪守御千户所，改哨马营为土门。至嘉隆时，套虏阿赤兔等假欵为名，住牧扒沙劫掠，窃据肆螫不已。万历戊戌，巡抚甘肃田乐、总兵达云、分守道张蒲谋谐文武，带甲万人，扫空穴幕，恢复其地。改扒沙为大靖，建城修郭，奏筑新边，疆界乃通中卫、靖远诸路。明末，闯贼变乱，亦置伪官。我朝定鼎，望风归顺。顺治戊子，逆回猖判，妖氛旋靖，边塞永宁。雍正三年，遂改古浪所为古浪县。洵西垂之保障云。

古浪县疆域图说

凉郡五县，据东南形势之盛者曰古浪。三面皆山，龙沙绕北，峡内之河夹两山而出。县为和戎旧治。昔人谓井陘道上，车不得方轨，骑不得成列，即如是也。县西三十里为西川堡，其隘口曰哈西、曰横沟、曰黑沟，明都御史石茂华奏筑，外控鲁而内控番，山川险夷筹之熟矣。南三十里曰黑松堡，昔则松柏丸丸，于今牛山濯濯，隘口之险稍逊安远，而番夷入市而来者殆无虚日，孰捍牧圉，未可以纵彼胆玩也。黑松南三十里曰安远，距县六十里，鸳鸯池在其北，青沙湾在其西，皆系隘口，其南则乌稍岭，平、古二县分界处也。地当万山之中，四通番鲁之路，而可可一口地极冲要，天险既周人谋得不备哉。居安、黑之东北为黄羊川，距县三十里，川东为石门峡，流水汤汤，铁关金锁地也。由峡而进为大小滩，更远为不毛山，东西横亘，脉接天梯，山南属平番，山北属古浪。番族世居于此，假梵寺以藏奸，癸卯之往事可鉴已。石门山后，越石城、铁城至大靖之峡门，道路盘曲，距县百五十里。峡中分上下酸茨沟、上下条子沟，亦番族游牧之地。而套虏之害自昔甚于西番，所以，弁设参戎。如境外之石峡子、明沙嘴及土里无素等处，所宜深谋远虑者也。靖之山川相接者曰土门，距县六十里，山平川阔，直达武威。虽有鹅头山、黄花滩隘口，然在故明为冲，今则差缓矣。

由土门西抵双塔，距县三十里，武、古分界于此。吊严玺之忠勇，知当年之强番为害。而今德威所被，远迈前朝，南北东西无思不服。第国家有百年不用之兵，而不可有一日不备之武。因地以制宜，安内以攘外，君子之政惟时也。

里 至

县治在府东一百三十里，东接平番，西连武威，南界乌稍，北抵大漠，广二百五十里，袤一百有五里。东至大靖石河一百六十五里，平古交界；南至安远乌稍岭七十五里，平古交界；西至番城台四十里，武古县治交界，河西六十里，武古营汛交界；北至圆墩边六十里，武古县治交界；东南至水乡沟一百五十里，平古交界；西南至可可口山八十里，平古交界；东北至大靖边一百七十里，平古交界；西北至双塔堡三十里，武古县治交界，沙沟五十里，武古营汛交界。

山 川

古邑三面皆山，凡山之有居民者入村社，有隘口者入关隘。峻岭居其南，严边固其北。峡路一线，扼甘肃之咽喉；河水分流，资田土之灌溉。近而千峰俱峙，远则一望无涯。并列山川形胜如左：

东山 县东二里。

石头沟山 县东五里。二山多田

铁柜山 县东南七里许。险要可设伏。

油榨墩山 县东南二十里，田半。

- 黑松林山 县东南三十里，昔多松，今无。田半。
- 显化山 县东南三十五里，其形高耸，由岭至麓，寺宇迤迳，胜地也。
- 龙沟山 县东南四十五里，田寡。
- 石门山 县东南五十里，石壁相向若门，松柏寺观层布，一县胜景。
- 狼牌山、把都山、岔岔山 皆县东南六十里，番帐。
- 石城山 铁城山 野马墩台 皆县东南七十里。
- 东泉山、白虎岭 皆县东南八十里。以上五山，番汉接壤，田寡。
- 不毛山 县东南百里许，不生草木，即番夷住牧处。
- 古龙山 县南里许，蛇延如龙形，田寡。
- 跌路崖山 详见古迹。
- 香林寺山 详见诗歌。
- 界牌沟山 县南二十里。
- 起龙沟山 县南二十里，田半。
- 湖滩洼 县南二十五里，新垦。
- 香筒坡 县南二十里。
- 寺洼 县南三十里，田多。
- 难泥沟 县南三十五里，田寡。
- 柳林台 县南三十五里，田半。
- 大坡、小坡 皆县南四十里，田寡。
- 雷峰山 详见诗歌，中有番寺，名极乐。
- 响水洼 县南六十里，田半。
- 牛头山 县南七十里，象形而名，地不可耕。
- 乌稍岭 县南七十五里，平古交界。
- 长洼 县西南三十五里，田多。
- 东石嘴、西石嘴 皆县西南六十里。
- 分水岭 县西南七十里。
- 天梯山 县西南七十里，即古雪山，四时积雪。
- 陈家沟 县西三里，田半。

王府沟 县西三十里，田半。

平顶山 县西北五里。

杜家沟 县西北十里。

断山沟 县西北十五里。以上田半。

莲花山 县西北三十里，在双塔堡西，上有寺庙。

牛尾岭、逢春岭 皆县东北三十里，田寡。

旱台 县东北四十里，田多。

安家坪 县东北五十里，土门南十里，田半。

楼房沟 县东北六十里，土门东南十里，田半。

砚山、笔架山 与砚山相连而少高，三峰并峙，中峰特起，故名。皆县东北六十里，在土门南，田多。(古浪文风骏起，笔架山得其位也。)

沙窝坡 县东北六十五里，田寡。

鹅头山 县东北九十里，状如鹅头，距土门边三十里，沙地，田寡，出煤。并见隘口。

大直沟 小直沟 县东北百里许。

长岭 县东北一百四十里，大靖东南十五里，田多。

石狮子山、石圈儿岭、鹿圈儿岭 皆县东北一百五十里，田寡。

西川 县西，广六里，长三十里，田多。

黄羊川 县东南三十里，群山环峙，中夹平川，广五里，长三十里，田多。

小滩、大滩 在石门山后，系番夷住牧处，出煤。

干河滩 县北，广八里，长三十里，石河无水。

铧尖滩 县北六十里，其地平衍可耕，以河水微细，不足引灌，故芜。

黄花滩 县东北九十里，距土门边三十里，无水，草丰可牧。并见隘口。

古浪河 其源出乌稍岭，绕县北流，引渠灌田。

石门峡河 其源出峡内，由黄羊川流入古浪河。

南冲水、把都水、岔岔水、西响水、庙儿沟河 以上皆县东南分流，汇

石门河，入古浪河。

龙沟河 其原出龙沟山。

芥菜坡河 自安远西北流入龙沟河，至黑松北汇火烧盆水，入古浪河。

鸡冠石峡 在雷峰山北。

响水河 其原出响水崖，入萱麻河。

柳林河 即萱麻河。

萱麻河 自鸡冠石峡、牛头山发源。

倒坡河 县西南黑沟发源，由分水岭西北流至西庄，汇萱麻河，出火烧盆，入古浪河。

柳条河 县西南四十里，其田半，其水出黑沟，由分水岭流至西山坝。

东响水 大靖水源。

上酸茨沟水 发不毛山，汇东乡水，出峡门灌田。

水响沟水 此水由药水跌水流入平番灌田，系平古交界。

村 社

古邑三面皆山，独东北一隅地多平衍，川则营堡村寨遥相错落，山则湾岭沟洼多有居民。盖承平以来，烟火倍稠，鸡犬之声相闻焉。爰列村社如左：

钱家闾门 县东十里。

芦草沟 县东十五里。

孔家地湾 县东二十里。

马家窝铺 县东二十里。

王家水 县东三十里。

新窑、东洼 皆县东三十五里。

麻口 县东四十里。

- 聚兵台、头沟岭 皆县东四十五里。
- 东、西碛儿水 县东五十里。
- 薛家水、抬车沟、小林子 皆县东五十五里。
- 打喇水、四道岷、红土湾 皆县东七十里。
- 横沟 一名井儿沟，县东八十里。
- 横梁山 尖山子 皆县东八十五里。
- 下条子沟 县东一百里。
- 上条子沟 县东一百二十里。
- 庄浪沟 县东一百三十里。以上在东山内。
- 胡家庄 县东南二十五里。
- 一棵树、梁家庄、毛家大庄、七鼓堆湾 皆县东南三十里。
- 南冲堡 即古城寨，其南有番寺。
- 小南冲、干沟口 皆县东南五十里。
- 香水泉、王家沟、张家沟 皆县东南六十里。以上在黄羊川内。
- 石窑子、下酸茨沟 即团庄，皆县东南一百一十里。
- 上酸茨沟 县东南一百三十里。
- 抬车岭、石圈儿 皆县东南一百五十里。
- 岔路墩 县南十八里。
- 庙儿沟 其南有番僧朵什寺。
- 童家地湾、黄泥岗、尚家沟 皆县南三十里。
- 龙沟铺 县南四十五里。
- 枰沟湾 县南五十里。
- 西庄 县西南三十里。
- 坟洼、柳条河 并见山川。皆县西南三十五里。
- 天平洼 县西南四十里。
- 严家湾 县西北十五里。
- 大洼沟 县西五里。
- 冰沟墩、樊家墩 皆县西十五里。

- 王府沟、韭菜冲、西山堡 皆县西三十里。
胡家湾 县西北二十五里。
双塔堡 县西北三十里，武、古交界。
八里营 县北八里。
小桥堡 县北十五里。
泗水堡 县北三十里。
元墩子 县北五十里。
永丰堡 县北七十里。
定宁寨 县东北三十里。
王府营、新庄 皆县东北五十里。
胡家边 县东北六十里。
夹山岭 县东北九十里。
张兴寨 县东北一百五十里，在大靖南，俗名团庄。

社 仓（附）

- 长流坝仓 县东北十里，本坝民房内贮。
头坝仓 县东北三十里，定宁寨贮。
三坝仓 县正北三十里，泗水堡贮。
四坝仓 县正北三十里，本坝民房内贮。
五坝仓 县正北三十里，双塔堡关帝庙贮。
上包圪坝仓 县正北三十里，双塔堡贮。
暖泉坝仓 县西北十里，民房内贮。
西山坝仓 县西南十五里，民房内贮。
黑松堡仓 县正南三十里，本堡贮。
安远堡仓 县正南六十里，本堡贮。

黄羊川仓 县东南三十里，张家墩民房贮。

黄泥岗仓 县东南三十里，民房贮。

黄羊川菜子沟口仓 县东南三十五里，民房内贮。

王家水仓 县正东三十里，民房内贮。

新窑坝仓 县正东三十里，民房内贮。

东碛儿水仓 县正东六十里，民房内贮。

酸茨坝仓 县正东一百二十里，寺院内贮。

抬车坝仓 县正东二百里，民房内贮。

土门堡仓 县东北六十里，本堡贮。

大靖堡仓 县东北一百五十里，本堡内贮。

以上各仓粮石，节年添增不一，难以注数。

户 口

前代边徼，寇烽时警，自承平日久，生齿渐繁，徙居者亦渐众，故户口加增，倍于往昔矣。

古浪县正统中，户一千二百二十，口三千二十有六。嘉靖中，户三百一十，口六百七十有一。今盛世滋生人丁三千八百六十有三，口四万四百三十有六。乾隆十二年，户六千三百九十有三，口六万五千五百一十。原额编审人丁五千六百有五，除老亡丁四十有八，实在五千五百五十有七。

保 甲

古浪县属本城保正一名，甲长一名。大靖、土门各保正三名，甲长三

名。双塔、安远、黑松、头坝、长流坝、包圪坝、暖泉坝各保正一名，甲长一名。黄羊川保正一名，甲长二名。打喇水保正一名，甲长一名，西山坝保正一名，甲长二名。四坝、五坝各保正一名，甲长一名。城乡共保正二十名，甲长二十二名。

田 亩

古邑山田间岁而耕，《周礼》所谓一易再易也。川田专望引灌，惟二暖泉坝泉水浇注，最称沃壤；若三、四等坝河流最远，稍旱即涸，如之何哉。

古浪县原额征屯地三千九百三十六顷九十五亩一分四厘，内豁免抛荒地四百四十一顷三十三亩六分八厘，实征熟地三千四百九十五顷六十一亩四分六厘。额外清丈、自首并节年劝民开垦熟地二百二十一顷一十四亩六分四厘，又于雍正八年钦奉上谕事案内，援例照寄庄寄粮之例，武威县改归古邑更名地八顷八十八亩六分九厘五毫。以上共实征熟地三千七百二十五顷六十四亩七分九厘五毫。

赋 则

古邑山田赋轻，水田赋重。大抵下种一斗，粮如种数。至山地则不然，盖缘山土硗瘠，间岁一种，无水浇灌，又虑霜早，不种秋禾，故额赋悬殊。乃下坝之河源最远，易致歉收，而额赋列于水地，居民遂不无偏累矣。

原额本色正粮七千三百三石七斗六升五合四勺，大草七万三千三十七束六分五厘四毫。内除荒免粮一千二十八石九斗三升一合八勺，大草一万二百八十九束三分一厘八毫。实征本色正粮六千二百七十四石八斗三升三合六

勺，大草六万二千七百四十八束三分三厘六毫。额外清丈、自首并节年新垦额征本色粮二百三十七石二斗五升七合四勺，大草二千三百七十二束五分七厘四毫。又于雍正八年钦奉上谕事寄庄寄粮案内，添征废藩禄地更名粮八十八石八斗六升九合五勺，例不征收草束。以上共实征屯科正粮六千六百石九斗六升五勺，旧例大草六万五千一百二十束九分一厘，新例小草一十六万七千四百五十三束七分六厘八毫五丝七忽一微四纤二尘八渺六漠，原额征马粮三百二十五石五斗七升三合五抄。乾隆二年，在于遵旨密议事案内，奉旨自戊午年为始，概行豁免征讫。

雍正五年，奉旨通省以粮载丁。按照实征熟地并清丈、自首节年开垦起科入额地亩核算，共应均载地丁银六十八两四钱一分四厘五毫五微。又于雍正八年，钦奉上谕事案内，详请具题武威县改归古邑更名地丁银九钱二分四厘二毫四丝二忽八微。以上共实征地丁银六十九两三钱三分八厘七毫四丝三忽三微。

顺治十三年，岁征无定额，畜税银三十一两六钱三分四厘。今岁征无额，畜税银三十二、三、四两，每岁不等。

顺治十三年，额征油磨店课银七十两八钱。今岁征油磨煤店斗牙税课银一百四十一两三钱五分。

凉州府岁征古浪县属城乡当铺四十六，共银二百三十两。

俸薪等（附）

知县 岁支俸银四十五两。养廉银六百两，实领粮七百五十石。公费三百六十两，折粮四百五十石。衙役工食六百二十两四钱。

儒学训导 岁支俸银四十两。

典史 岁支俸银三十两五钱二分，养廉银六十两。

黑松驿丞 岁支俸银三十两五钱二分。

大靖营

参府一员 岁支俸银三十九两三钱三分九厘九毫六丝，薪银一百二十两，蔬菜烛炭银四十八两。

守备一员 岁支俸银一十八两七钱五厘九毫六丝，薪银四十八两，蔬菜烛炭银一十二两。

千总一员 岁支俸银一十四两九钱六分四厘七毫二丝，薪银三十三两三分五厘二毫八丝。

把总两员 每员岁支俸银一十二两四钱七分一厘，每员薪银二十三两五钱二分九厘。

安远营 都司一员，岁支俸银二十七两三钱九分三厘九毫六丝，薪银七十二两。

古浪营 把总一员，每季俸银八两二钱。

土门营 守备一员，岁支俸薪银九十两六钱一分五厘九毫九丝。

黑松营 原额把总一员，岁支俸薪银三十六两。

物 产

边土多寒，古邑尤甚。至春夏之交，百昌乘时滋长，土宜所有，载诸简编。

谷类

小麦、大麦、莜麦、青稞、糜子、谷子、大豆、豌豆、扁豆、胡麻、菜籽。

蔬菜

白菜、芹菜、芥菜、菠菜。

羊肚菜、蘑菇二物产于林中。

葱、韭、蒜、茄、葫芦、茄莲。

萝卜（萝卜）有红、白二种。

芫荽、茼蒿。

苦蕒叶，青茎，白而有汁，即苞，又名银针。

地软皮，无根，浮生地上，形似木耳而小。

莲花菜，似茄莲而叶微白，大叶丛包小叶，形如合拳，根叶皆可食，四川名金瓜菜。

葛苣。土参，形似参而不坚，味甘，春秋月掘，蒸食，产山田中，俗名野胡萝卜（野萝卜）。

沙芥、沙葱二物产于沙漠。

果类

杏、梨、李。

柰，有青黄二种。

楸，色红，味甘酸，甘州取汁煎为果单。

林檎，有红、黄、白三种，味亦各别。

苹果，间出。

延寿果，间出。

木类

松、柏、桑、榆、柳。

白杨、柁子二物产山内。

花类

探春。

龙柏，似探春而色稍紫，逢季开花，俗名为四季龙柏。

玫瑰，有红、黄二种。

萱花。

金凤，俗名海纳。

芍药，牡丹。

金铃花，即沙棘（沙枣）花，形似铃而小，故名，开时香闻数里。

婴粟。

汉金莲，有五色，一名虞美人，一名满地娇。

山丹花，叶似百合，色赤而小，生山中。

百合，即卷丹。

鸡冠。

红花，用以染造。

菊，有十数种。

草类

苜蓿 马兰。

芨芨，叶丛生，茎细圆而长，用以索绹织席。

倒生草，茎叶似芦而极细，田中有则妨耕锄。

沙米，丛生沙漠中，似蓬色白，叶尖有刺，米藏谷中，雨涝始生。

刺蓬，蓬类，色微红，生刺，有子，味苦辛。

绵蓬，似刺蓬，无刺，有子，味苦辛。

以上三种皆草子，年饥则觅以充腹，但味涩性燥，多食致病。兼以有无不常，孰谓其可备荒哉。

药类

黄精、甘草、麻黄、大黄、荆芥、紫苏、益母草、白芥子、莱菔子、车前子、菟丝子。

禽类

喜鹊，一名鸞，

鸚鵡、寒鴉。

老鴉，似烏而大。

崖鴉，黑羽赤喙赤足，不宿于樹，故名。

馬雞，色青眉白，喙、眼、足俱赤，尾黑而長，生林中。

野雞。

沙雞，形似鸕鶿而群飛，生于沙漠，有無不常。

鷹。

鷂，似鷹而小。

獸類 馬 牛 騾 驢。

犏牛，力可耕地。

牦牛，不能耕犁，專宰以食，尾可注旗首，二物產番內。

洮羊，似綿羊而大，產番內。

綿羊，尾大于洮羊。

山羊，尾小須長。

黃羊，似獐，色淡，角黃有節，間出野地。

蚕，丙寅夏始試養，潔白，無殊于江左。（蚕由鶴沙徐令試養，既無殊于江左，後來者其繼之。）

黃鼠，天旱則害稼。

無鱗魚，間有，重不過斤。

他喇、卜花，似獾而小，穴地自藏，冬蛰春出。

兔，間出。

古浪水利图说

古浪有三渠，曰古浪渠、土门渠、大靖渠，皆赖水以转磨、灌田也。然有泉水坝，有山水坝。其为泉水坝者，于古浪则曰暖泉坝，所谓高崖泉者也。泉出城西二里许，经冬不涸，故名暖泉。余坝皆山水，源发于乌稍岭北，合安远之芥菜坡水、黑松之龙沟水、火烧盆水、黄羊川之石门水、庙儿沟水，以成古浪河流。东风解冻，水皆盛注。然自古邑附郭以南，崇岗峻岭，东西迤邐，

或间岁一种，无需乎水。至郭东长流坝，始于总河引水灌田，自是而下，东则古土头坝合引之，土门二坝、东西沟、新河、王府合引之；西则包圪坝引之，四、五坝合引之，三坝引之。西山坝地处高阜，别引柳条河山水灌田，雨少即涸，不与诸坝例。此古浪渠之大略也。

土门则又有一暖泉，源出城南八里许，亦经冬不涸，别称漪泉，暖泉一坝引之。余坝则引古浪河山水，曰土

头坝，曰二坝东沟，曰二坝西沟，曰新河，曰王府。王府系明藩禄地，今从武威拨入。至新河、东沟两坝，离河源皆远，地瘠赋逋，与古渠三、四坝同病，此土门渠之大略也。

大靖则又有一泉，曰湖滩泉，源出城南二里许，教场一坝引之。余皆山水，但与古浪河源不属，别从不毛山发源，自酸茨沟、石峡东、西分出引之者，则为长岭、山泉、大河三坝。此大靖渠之大略也。自三渠十七坝而外，余坝皆山田矣！

又分山口为四大水头：曰王家水，曰东西窑儿水，曰薛家水，曰打喇水。以水名，实未尝有水也。然则乌乎水？问诸土人，则曰：山中得水为艰，幸掘井得泉，故谓之水头，有水名无水实也。

至古浪诸水田，其坝口有丈尺，立红牌刻限，次第浇灌，或时加修浚，

士民无不均出效力，水利老人实董成焉。现有奉宪碑文可据。而三坝、四坝、东沟坝、新河坝，离水源颇远，议者欲从可可口开山数里，引平番县镇羌一带之水，顺安远就势而下，则古浪河流愈旺愈畅，从三、四坝直抵铧尖滩，诸旷土皆可化为沃壤，实奇功也。惜有沮之者，其议遂寝不举云。

渠坝水利碑文

古浪处在山谷，土瘠风高。其平原之地，赖水滋灌，各坝称利。向例使水之家，但立水簿，开载额粮。暨用水时刻。如有坍塌淤塞，即据此以派修浚。无论绅衿士庶，俱按粮出夫，并无优免之例。历年以来，虽亦无甚争端，然犹未得经久之道也。兹蒙抚宪大人黄，矜恤民瘼，加意水利，飭令各分水渠口，俱立石碣，用垂久远，以防偏枯兼并之弊。良法美意，所以为群黎计者，至详且尽。凡兹士庶，莫不踊跃乐从、欢欣载道矣。

兹遵宪示，将各坝额粮额水，并分水渠口长阔以及流灌备由，刊刻于后：

各坝渠口广狭不等，各载于后。

各坝粮草多寡不一，各载于后。

各坝各使水花户册，一样二本，钤印，一本存县，一本管水乡佬收执。稍有不均，据簿查对。

各坝水利乡佬，务于渠道上下不时巡视。倘被山水涨发冲坏，或因天雨坍塌，以及淤塞浅窄，催令急为修整，不得漠视。

各坝水利乡老，务要不时劝谕、化导农民，若非己水，不得强行邀截混争。如违，禀县处治。

各坝修浚渠道，绅衿士庶，俱按粮派夫，如有管水乡老派夫不均，致有偏苦受累之家，禀县拿究。

乾隆八年四月十八日邑令安泰勒石

古浪渠

暖泉坝 县北五里，合板槽、暖泉二沟为一坝。渠口，板槽沟东至由官路西拖石坝里首，西至傅家崖，南至泉脑，北至龙王庙。暖泉沟，东至山水河沿，西至由官路东拖石坝外首，南至陶家崖，北至头水磨。板槽沟额粮，二百三十五石零，暖泉坝额粮二百六十三石零，草随粮数。板槽沟额水三百二十六个时，暖泉沟额水四百零九个时。板槽沟使水花户三十四户，暖泉沟使水花户五十一户。板槽沟渠水自县城西南灌田起，至八里营止，长十里，阔五里。暖泉坝渠水自县城东南灌田起，至严家湾止，长一十八里，阔七里。

长流坝 县东北十五里。各坝俱在平坦分水，惟长流坝缠山仰沟，漏沙悬崖，行水艰难。古设木槽一通，帮高一尺，底宽三尺七寸，屡被各坝告减。总以康熙五十九年印照为凭：木槽照依官尺，除底帮高四寸，除帮底宽二尺八寸。额水粮二百九十石，草随粮数。额正润水三百五十五个时，使水花户共五十八户。分水口自古浪峡起，至土头坝河沿止，共长三十里。

头坝 县东北三十里。渠口与土头坝合闸，阔各七尺。因土头坝田地穹远，外让加润沟闸口一尺八寸，闸口界在水平庄。额征水粮三百五十石零，草随粮数。额水四百余时。使水花户五十余户。渠水自燕儿窝灌田起，至土头坝渠界止，共长一十八里。

三坝 县北三十里。渠口阔七尺二寸，深浅随水低昂。额粮六百六十四石二斗四升七合一勺，草随粮数。额水七百一十四个时。使水花户一百余户。渠水自叶家庄灌田起，至武威三墩地界止，共长五十五里。

四坝 县北四十里。渠口闸阔五尺五寸八分零，深浅随水低昂。额粮五百五十八石，草随粮数。额水六百一十八个时，使水花户五十九户。渠水自暖泉何家庄灌田起，至元墩子止，共长六十里。

上下五坝 县北三十里。渠口闸阔四尺四寸四分，深浅随水低昂。额粮四百四十四石三斗三升，草随粮数。额水六百五十二个时。使水花户一百二十户。渠水自卫家庄灌田起，至黄渠王家庄止，共长五十里。

包圪坝 县西北二十五里。渠口闸阔三尺八寸五分六厘，深浅随水低昂。闸口界在水平庄。额水粮三百八十五石六斗二合，草随粮数。额正、润水三百二十八个时。使水花户八十四户。渠水自何家庄灌田起，至下五坝崖头墩止，共长二十五里。

西山坝 县西三十里。引柳条河水灌田，雨少即涸，并无闸口时刻。

土门渠

暖泉坝 县东北六十里，土门东北二里，合上、下教场二沟为一坝。渠口阔四尺五寸五分，下教场沟渠口一尺合闸，按粮分水，闸口在贾家磨上。上教场沟使水另有泉源，并无闸口。正额水粮二百一十三石六斗七升一合五勺。上教场水粮三十石零五斗。下教场水粮三十四石五斗一升。正额水二百六十三个时。上教场一百四十个时，下教场一百五十三个时。暖泉、教场共使水花户九十一户。本坝渠水自泉脑灌田起，至新河坝地界止，共长一十五里。

头坝 县东北五十里，土门西南十里。分水渠口与古头坝合闸，阔各七尺。因土头坝田地穹远，外加润沟闸口一尺八寸，深浅随水低昂，闸口界在水平庄。额征水粮三百三十六石六斗九升九合，草随粮数。额水三百八十八个时。使水户口共一百二十七户。本坝渠水自何家磨灌田起，至暖泉坝地界止，共长一十五里。

二坝东沟 县北五十里。分水渠口阔四尺五寸三分，深浅随水低昂，闸口界在三盘磨。额征水粮三百一十六石七斗七升六合，草随粮数。额水三百六十个时。使水花户六十五户。渠水自三盘磨灌田起，至凉州官路止，共长三十里。

二坝西沟、新河、王府 县东北三十五里起，至六十里地止；土门西南十里起，至二十五里至。二坝西沟、新河、王府与东军沟合闸分水。其东军沟闸口阔四尺五寸三分，独沟另行。其西沟、新河、王府三沟共一闸口，共阔九尺三寸六分八厘。三沟在伙，自下而上轮流歇全河水灌田，永为定例。其闸口深浅随水低昂，闸口界在三盘磨。西沟正额水粮二百八十七石八斗八

升五合，草随粮数；正额全河水一百一十三个时。王府正额水粮八十八石八斗六升九合五勺，并无随粮草数；正额全河水四十四个时。新河正额水粮二百二十八石，草随粮数；正额全河水一百零三个时。西沟、王府、新河三沟共使水花户一百三十八户。本坝渠水自古头坝定宁寨灌田起，至新河永丰堡边墙止，共长四十余里。

大靖渠

山水三坝 靖城东、南、西一、二里至二十里不等。大河坝共使水户口二百零二户，地界长十五里，每轮水至大路起派。大河坝分水渠口与长岭坝分闸，各阔五尺，界在阎王磨上。本坝水粮一百九十七石四斗四升四合，草随粮数。额水四百零四时，外加润水六十五时。长岭坝分水渠口与山泉坝合闸，各阔五尺，界在小干沟口对直。本坝水粮一百九十四石七斗三升九合九勺，草随粮数。额水三百八十七时，润水三十九时。共使水户口一百五十二户，地界一十五里。山泉坝分水渠口与长岭坝合闸，各阔五尺。本坝水粮一百九十六石九斗一升五合，草随粮数。额水四百零二时，外加润水三十时。共使水花户一百六十六户，地界长十五里。外有上泉沟泉水一处，以为靖城口水。

泉水坝 靖城西北里许。教场坝水源二处，在城南湖滩内，西边大泉一处，东边郑家磨塘泉一处，余皆漏沙小流。遇大河坝派正水时，仍留泉水原流。沙嘴沟分水闸口各二尺，教场坝因口水外阔一寸五分。本坝额征水粮一百八十六石一斗四升五合三勺，草随粮数。正额水三百六十八时，润水四十五个零半时。庙田占水六时，不赋不役。使水户口共一百九十四户，地界长五里。

以上依各坝碑文录，碑皆立于坝口。

水利碑文说

河西讼案之大者，莫过于水利。一起争端，连年不解，或截坝填河，或聚众毒打。如武威之乌牛、高头坝，其往事可鉴已。古小邑，土朴风淳，数十年来未争水利，今更勒宪示碑文，按地载粮，按水均粮，依成规以立铁案，法诚善哉。间有不平之鸣，曲直据此而判。仪秦无所用其辩，良平无所用其智。片言可折，事息人宁，贻乐利于无穷矣。

山田坝(附)

无水而亦名坝，界赋则也。有上山、浅山、歇地、查地可辨焉。获则耕一即可余二，不获则耕九不能余一。厥田下中，厥赋下下，其古邑山田之谓乎。故仅列其名而不录粮草之目。

古浪

黄羊川 内统胡家庄、一棵树、南冲、干沟口。

黑松坝 内统庙儿沟。

新窑坝 内统王家水。

大靖

打喇坝 内统东碛儿水、薛家水、小林子。

酸茨沟坝 内统条子沟、庄浪沟。

抬车坝

土门

西碛(窑)儿水坝 上山地。

鹅头坝 边外沙漠地。

井(附)

井之名，不可枚举，而其中如大靖外城耿井，为守备耿漠捐俸所穿。大靖城内文昌井，俱署令介倡民捐资瓮砌，尤著名焉。

泉(附)

高崖泉 在县西二里，有二，一为暖泉坝水源，一为板槽沟水源。

香水泉 名泉实井。

菜子沟泉

小暖泉

马兰沟泉

以上四泉，俱在黄羊川内，滋润不一。

暖泉 一名漪泉，在土门城南八里，即暖泉坝河源。

湖滩泉 在大靖城南二里许，即教场坝水源。

桥 梁(附)

- 通津桥 县郭中，鼓楼下。
洪渡桥 县南郭门外。
石 桥 县北郭外。皆暖泉水。
先农桥 县东里许。
安澜桥 县东北二里。皆古浪河水。
杨家桥 县北八里，系暖泉水。
香林桥 县南十五里，系古浪河水。
双龙桥 县南二十五里，系火烧岔河水。
龙沟桥 黑松南十五里，即龙沟河水。
利济桥 安远郭北，系干河。
东壁桥 土门东郭内，系暖泉水。
平沙桥 大靖东郭外，系大河坝水。
普渡桥 大靖南郭外，系山泉坝水。
迎恩桥 大靖西郭外，系教场坝水。二桥皆笔贴式阿林建。

古 迹(附丘墓)

汉代以前未例版图，故古迹稀少。自后酸沟盐泽已入咏歌，龙堆瀚海之间，谅亦吊古者之所不废也。

古浪

永寿寺 县城北郭内，元时建，后遭兵燹。明洪武十九年重修。

醋沟 古浪河，唐时名醋沟，岑嘉州诗云：雁塞通云泽，龙堆接醋沟。按：古浪河旧流，北入白海，经潞野，今镇番盐泽也。又从沙嘴而东，北绕黑山，古龙堆也。镇番沙嘴堆，至今犹似龙形。

跌落崖 县南峡内十里，山巅突出而下覆，其势欲坠。明指挥王国泰题其上曰：山川绝险。

鲁般石 县南峡内十里河有巨石，其上如人坐卧迹，相传为鲁般憩息处。按：周时，公输子名班，鲁人也。《人物备考》又云：班，敦煌人。周时并无敦煌郡，何有鲁班？意敦煌人乃鲁般，非鲁班也。然《檀弓》班亦称般，姑俟考。

甘酒石 县南峡内十里，详见碑记。

古和戎城 唐郭元振所筑，县南峡内十五里，旧址犹存。

左公墓 县北二十里许，有石碣，上题“明刑部侍郎左公墓”。墓在道东，虽名号、里居无考，其官爵不可没也。

严将军祠 详见碑记。

毛侯墓 在黄羊川内，详见乡贤。

鸳鸯池 详见诗歌。

土门

显圣宫 旧在城内。明都指挥张显茂与鲁战败，逼城下，忽赤云下覆，鲁败北，遂立祠祀关圣。其地湫隘，后改建郭中。

大羌河 城南八里，古为巨流，套虏北遁以马厓塞源，遂成细流。今两岸高丈余，遗迹犹存。

大靖

鹤来松 南郭外，古松，相传有鹤来栖。

孤山墩 郭外东北二里许，明田、达二公筑以哨瞭备鲁。详见诗歌。

祥 异

圣王之世，嘉祥叠见，然春秋不讳灾异，所以重垂戒也。洪范休咎，各以类应，实人事之感召，不得谓气数之适然。爰列可稽者如左。

康熙七年戊申大稔。

四十七年戊子大稔。

四十八年己丑三月，霾起自西北，昼晦如夜。

四十八年九月十二日地震。

五十一年壬辰，大饥，发赈免赋。

雍正五年丁未，黄鼠害稼。

六年戊申，大稔，麦穗有长五寸许者。

八年庚戌七月雨雹，二坝伤禾麦。小者如卵，大者如拳。

乾隆三年戊午，蝻贼蝗特大，害稼。

建置志

城 郭

和戎之名，由来久矣，至明而改缮焉。雉堞兀然，足资弹压，诚万世所不可废也。余载“营堡”。

古浪县，明洪武十年修筑，计周围二百七十五步，高二丈五尺，厚一丈，东、南门各一，罗铺十，角楼二。罗铺，角楼今倾圮。东南依山无池，西北池深二丈五尺，阔二丈四尺。万历二年甲戌，补修以砖砌门。三年乙亥筑东郭，高二丈，厚一丈，周围四百六十五步。

公 署

前者奋武，今始揆文。官署总仍旧贯，其浅隘卑陋，门前几不能旋马。厅事后更复僦屋而居，虽土、靖各有行衙，而在城，吏舍未能完裕，尚宜拓建云。

县 署 旧署在城内北隅，明末遭兵燹倾圮，自守御所移居东郭已历年所。今县署因之，大门二楹，二门二楹，旁二角门，正堂四楹，堂下左右房

八楹，二厅六楹，左右两厢房、小院、书房四楹，东院房五楹，署止三层，共房三十有二楹。

盈丰仓 城内西南隅。

草场 城内西北隅。

察院 城内东北隅。久倾圮。

公馆 在北郭内，大、小房共一十八间，邑令徐、署令介、邑令蔡先后捐俸置。

捕衙署 在郭东南隅，内外三层，共房三十，有四楹，乾隆四年建。

古浪营把总署 城内北隅，内外三层，共房五十六楹。演武场，城北二里。

黑松营把总署 城内西北隅。演武场，城东南里许。驿丞署，城内东北隅。

安远营都司署 城内东北隅。演武场，城东南里许。

土门官署 县行署，城内西南。守备署，城内西北。丰盈仓，城内西北隅。草场，城内东南隅。察院，城内东北隅。久倾圮。演武场，城东北一里。

大靖官署 县行署，城内东北，明万历二十九年建，即旧监厅署。参将署，城内西北隅，明万历二十七年建。守备署，城内西南。千总署一，把总署二。丰盈仓，城内东北，邻县署。草场，城内东北。察院，城内东北。久倾圮。演武场，城西北一里。

坛 壝

坛壝之设，古称重典。祭坊祭表，迎虎迎猷，祀繁而不杀，所以事社稷先农也。至风云、雷雨、山川之神，普利万物，用处至享，殆其宜矣。

先农坛 城东南一里，大殿四楹，配房各二楹，大门牌坊四楹。耕田

一处，计地四亩九分，周围墙八十堵，仲春播种时祭。

社稷坛 城东南一里，仲春、仲秋祭。

风云雷雨山川坛 城东南一里，夏月祭。

厉坛 城西北里许，大殿四楹，清明、中元，民岁日祭。

各有祭银。

学 校

古邑旧未有学，设菜释奠阙焉。自改县后，频繁以荐俎豆，芹藻不废馨香，弦诵龠干，于斯盛矣。

古浪未改县以前，附凉州卫学考试。康熙五十五年，贡生韩生忠、吏员李守节，以额少人多会集士民，具呈前守御所崔建绩，详请另设所学。学使王云锦具奏，未蒙俞允。至康熙五十八年，所官崔建绩复援平凉卫例，详请设学。凉庄道蒋洞转详学使觉罗逢泰，题奏准添童生八名，仍附凉州卫学考试，教官廩增未另设。雍正三年，改所为县，始设训导一员，添廩增各二十名。彼时番夷不靖，军兴络绎，文庙、学宫未及创建。至乾隆四年奏请，始得立庙建学云。

文 庙 在城内西隅。大成殿四楹，尊经阁四楹，启圣祠四楹，即在尊经阁下。东、西庑各六楹，戟门四楹，东、西仪门各二楹，乡贤、名宦祠各四楹，省牲所小四楹，更衣厅小四楹，棂星门四楹，泮池一处，环桥一座，照壁一座，东、西栅门各二楹，春、秋丁祭银四十五两，祭器、乐器、书籍详载平番县志内。

儒学署 在文庙左。上书房四楹，厢房、厨房各三楹，明伦堂四楹，东、西斋房各四楹，仪门二楹，东、西角门各二楹，学书房二楹，门斗房二楹，大门二楹，

义 学 古浪有讼田者势屈，入所质水田一段，每年收租十石。城内

官地二段，一在城隍庙前，一在把总署东北，每年收租二石四斗，皆为学资，详载碑记。黑松、安远、土门、大靖、双塔，以上五处每学每年邑令捐粮四石，各就本仓领取。

驿 传

星轺所指，采风问俗，非戎马蹂躪比也。急则羽檄交驰，缓亦见星恐后，司事者又宜尽心焉。

古浪县明制领驿二，每驿各额军六十名，马骡六十四（头）。递运所三，每所各额夫五十名，牛车四十只（辆）。我朝定制古浪，黑松、安远二驿三所，边路五塘，其夫、马、牛车俱有定额。

古浪驿 夫二十一名，马三十二匹；递运所，夫一十四名，牛车九辆，驿、所皆南至黑松驿三十里接替，北至武威县靖边驿六十里接替。

黑松驿 夫、马、牛车与古浪同数，驿南至平番县镇羌驿六十里接替，所南至安远堡六十里接替，驿、所皆北至古浪三十里接替。

安远堡 经制驿夫五十名，因地寒苦，诸物少产，难以安马，呈详留所夫二十五名，牛车一十五辆，南至平番县镇羌驿，北至黑松，皆三十里接替。

塘，各马十匹，夫五名。

圆墩塘 东至土门，西至武威达家寨墩。

土门塘 东至夹山岭，西至圆墩。

夹山岭塘 东至黄家寺，西至土门。

大靖塘 东至平番县裴家营，西至黄家寺。

以上皆三十里接替。

寺 观

绀宇琳宫，足为城邑点缀，至能捍灾御患，死而成神者，又足祀也。用登简册，以志不忘。

城郭

- 文昌宫 郭西北隅。
魁星阁 城东南隅。
关帝庙 一在城西，每岁春、秋五月十三各有官祭银。一在北郭。
城隍庙 城东北隅。
土地祠 在北郭外。
龙王庙 一在城东，一在城南，一在城西，各里许。
龙泉寺 城西南里许，寺后有塔七级，高七丈，寺前、左皆泉，故名。
雷公祠 在南郭外。
雷 台 在北郭外。
旗纛庙 城西北隅。
马神庙 一在城东隅，一在郭东南。
八蜡庙 在北郭外。
忠孝祠 城东北隅。
节烈祠 郭西北隅。
大清宫 城南古龙山顶，即北极宫基址，康熙五十八年改建。
玉皇阁 即郭中古楼。
三官庙 在郭南隅。
元真观 郭南门外。
菩萨殿 城南门外。

- 普陀庵 城东南二里，庵后有塔七级，高七丈。
清凉寺 城南古龙山下。
转轮寺 城西二里。
永寿寺 在北郭内。
百子宫 城外西南。

土门

- 文昌宫 东郭。
关帝庙 东郭，顺治五年建。
三义殿 东郭外，即柏台。
显圣宫 外城内西北。
太岁庙 东郭外。
城隍庙 城西北隅。
土主殿 北郭外。
龙王庙 东郭外。
雷神庙 西门外，康熙四十三年建。
火神庙 城内，康熙四年建。
马神庙 东郭。
太清宫 城内，康熙四年建。
玉皇庙 西门外，崇正十年建。
三官庙 西门外，崇正十六年建。
斗母阁 北郭。
观音殿 康熙八年建。
娘娘殿 东郭。
灵官殿 西门外。
十王殿 东郭。
祖师殿 西门外，崇正十六年建。

大靖

- 文昌宫 康熙七年建。
关帝庙 城北隅，明天启元年建。
城隍庙 城西北隅，明崇正十三年建。
龙王庙 城南五里。
雷坛观 城东北里许，康熙四十三年建。
旗纛庙 城内东北。
马神庙 明万历四十四年建，在参将署东。
真武庙 在城北隅，万历年建。
东岳庙 城外西北，崇正四年建。
斗母阁 南门外。
财神阁 关内，康熙五十七年建。
白衣寺 城西门外。
寿国寺 外城东北隅，万历三十四年建。

黑松

- 文昌宫 城内。
关帝庙 南城内。
关圣阁 北郭外。
雷祖庙 城内。
三官阁 城内。
大佛寺 南城内。

安远

- 关帝庙 北郭外。
城隍庙 南城内，嘉靖四十四年建。
土地庙 南城外。

雷公庙 西郭外。

马神庙 中城内。

三师殿 北城内。

财神阁 城内。

风俗志

士、农、工、商执业

国有四民，士居其首，汉世力田，孝悌并重。而农不如工，工不如商，直货值之说耳。问业可以观风，故古之俗可得而述也。

邑士半读半耕，率有恒产，贫者砚田糊口，故质过于文，不务奔竞。农则其风更朴，田分山川，终岁勤动，衣食外即有赢余，不知逐末。商贾乃多陕晋人，其土著者，问庶人之富，数畜以对，盖力之外，辄以谷量牛马，亦秦风也。至工无巧技，若织褐、纺线，亦不废女工云。

婚姻、祭祀、丧葬、宾师、岁时、伏腊、礼仪

示奢示俭，觐国以为调剂也。古民大都从俭，然绅士之家，俭不废礼，为纪其大略以备采风云。

《周礼》仲春令会男女，盖言时也；纯币不过五两，盖言俭也，惟俭且时得之矣。然而婚礼有六，虽繁弗杀者何居？盖物不可以苟合，古人相见必以贄，况婚乎。古邑之缔姻也，既议婚，男家则遣媒氏列币二束或四束，往

女家定婚，即问名纳采意。继又列币数束。益以簪珥，姑往女家，令闺女拜见，曰插戴，即纳币意。至期，又遗女家以白金，多寡无定数，即纳聘意。边地虽无雁可奠，而不废亲迎，合卺之翌日，婿拜女家父母，曰谢亲。三日，新妇庙见入厨祀灶，拜舅姑，既诸姑伯叔，其邻里亲戚，各具金相贺，主家留款尽欢，曰排席。若贫家女未及笄适男家待年，曰童养。男未娶，入女家待婚，曰招赘。此秦风之陋，于礼未尽合也。

古者士始立庙。今之祠，古之庙也。古邑士立祠者殊少。每多祭于寝。四时之祭，春以清明，秋以中元，冬用民岁日，皆往拜墓。除夕岁旦始家祭，其有向门焚纸而悲号者，真委巷之风也。

古邑人子之遭丧也，衣衾具备，殓或以三日，或以五日，掩棺受吊则以七日。逾月而葬，从不掩柩，棺槨皆如度。其习礼之家，延大宾题神主，对圻守墓，终三年而更服。贫者亲死，以白布覆顶，即执杖趋市，躬自执事，葬无定期，悬棺而窆，人不以为非。《记》曰：礼不及庶人。《鲁论》亦称：与易宁戚。盖此意也。

师之教授也，自六义学而外，山川村堡亦多家塾，第专馆少而散馆多，逢节则致敬，岁底薄具修金，其束脩之遗意乎。

古俗将召伏也，各祠庙多演剧以侑神，于五日饮雄黄酒，食角黍，门皆插柳。中秋则陈瓜果以祀月。长至以肉合腐为食，曰食头脑。岁旦饵油面茶，曰年茶。燕宾或用全羊，曰羊席；或鸡豚交致，曰攒席。会数而礼勤，物薄而情厚，古民有焉。

番夷回类（附）

回夷而氓者也，氓之故近之；番氓而夷者也，夷之故远之。古邑番多回少，因于纪番特详。虽语言不通，往往伺内地虚实，通海夷声气。今并其户口纪之，非云壮我版图，正欲觐彼众寡强弱耳。

黑松东山围场沟安插番民四族。大头目一名，班重子改名万国宁。小头目三名，擦贡他改名常怀忠，捞藏改名向日新，古六汪东改名瞻云。班重子住牧围场沟，擦贡他住牧龙沟脑松林，捞藏住牧白土坡，古六汪东住牧石炭沟壑岷。

以上四族，番男六百七口，番妇子女六百七十五名，每年纳贡马三匹，在该管营汛交纳。

大靖、黄羊川安插番民二族。大头目一名，唢喃扎什改名武得。小头目七名，班马擦贡改名六玉，花木牙改名马得安，哈隆炭改名黄进林，喇颗子改名汪得池，管卜灿盖改名汪于池，六加思加改名喇有人，汪思加改名乔国志。唢喃扎什同班马擦贡住牧野马墩，花木牙住牧条子沟，哈隆炭住牧庄浪沟，喇颗子住牧酸茨沟，管卜灿盖住牧小直沟，六加思加住牧大、小南冲寺，汪思加住牧尚家沟。

以上二族，番男九百七十七口，番妇子女共八百五十六口，每年纳贡马六匹，在该管营汛交纳。

安远柏林沟安插番民二族。大头目一名，古六擦贡改名荣安。小头目二名，多尔只改名寿国宁，树切班第改名卜世年。

以上二族同住牧柏林沟，番男二百九十二口，番妇子女三百一十六口，每年纳贡马二匹，在该管营汛交纳。

番族依深山而居，不植五谷，惟事畜牧，磨面和乳以为饮食，果其腹者畜类也。妇人喜以螺钿为饰，跣足披发，别之曰狗西番。盖又非土番之比矣。

回回来自西域，今则蔓延中国矣。湟中一带极多，独古邑二、三十户。其饮食年朔，虽率彼夷风，然未敢梗化，又各有章教及乡约，以稽查统率，庶无患焉。

仙 释(附)

佛老，异教也。古地小异，罕闻炼灶参宗诸术，梵僧皆立教于番地，顶礼供养，称活佛，称法台，信乎佛法可以治夷矣。若隶内之敲铙击鼓，念嘛呢而资衣食，则曰黄衣木布。与僧道挈妻带子者，皆谓之火居，胥得以民治之。

扒沙梵僧 僧梵修于扒沙寿国寺，番夷供养已久。明万历二十九年，田、达二公恢复松山，入寺见僧端坐，令斩之，血出如乳，操刀者立毙。后改扒沙为大靖，屡被回禄，卜者以为枉杀高僧之故^①。乃立祠塑像，火灾果熄。像存，有碣记其事。

^①释养有灵，其故在于枉杀，非僧能司，大威福也。

官师志

秩 官

明设古浪守御千户所一员，丰盈仓大使一员，吏目一员，大靖仓监收县丞一员，在城古浪驿驿丞一员。我朝康熙二十九年，裁去仓官、吏目、县丞。雍正三年，改所为县，裁去守御所，设知县一员，儒学训导一员，典史一员，裁去在城驿丞，驿归县。

知 县

张 鷟 字汉辉，号东崖，河南陕州人，康熙乙未进士，雍正三年初改县任。

陈肇正 福建人，康熙乙酉举人，雍正四年任。

王柔徽 字懿恭，号藹人，直隶深州饶阳人，丁酉副榜，由教习雍正六年任。

王守曾 直隶宛平人，由贡生雍正八年任。

杨 爵 字于朝，保宁府阆中县人，由贡生保举，乾隆二年任。

安 泰 山西代州人，丙辰进士，乾隆七年任。

徐思靖 字哲次，号鹤沙，江南常州府荆溪县人，雍正乙卯举人，由内廷教习，乾隆九年任。

蔡青钱 字泉亭，广东潮州府海阳县人，雍正甲辰科举人，乾隆十三年任。

训 导

都 址 永寿县岁贡，雍正四年任。

萧 韶 碾伯县岁贡，雍正七年任。

宋 清 狄道县岁贡，乾隆元年任。

杨绣夷 醴泉县岁贡，乾隆三年任。

李 朴 凤翔县岁贡，乾隆七年任。

刘庆昌 渭南县岁贡，乾隆十年任。

典 吏

沈 增 浙江绍兴人，由吏员雍正六年任。

胡 鸿 直隶静海卫人，由吏员乾隆四年任。

金世忠 浙江杭州府仁和县人，由吏员乾隆八年任。

守御所

明

- 江 享 洪武年任。
杜 杰 正统年任。
张荣祖 万历年任。
杨 涟 天启年任。
杨生爵 崇祯年任。

国朝

- 赵龙黼 平番人，顺治年任。
赵经邦 富平人，康熙年任。
冯大猷 直隶昌平州人。
杨 玺 巩昌陇西武生。
潘汝楠 直隶易州武举，升任岷州卫守备。
江 标 宛平武举。
井星聚 江南扬州人，效力升广东惠州卫守备。
孟春芳 直隶人。
崔建绩 直隶天津卫人，由效力康熙四十九年任。
刘曰斌 直隶高阳武举，雍正元年任。

大靖参将

- 徐 龙 永昌人，万历二十七年初设任。
张奇才 永昌人。
张治策 甘州人。
王永中 山丹人。
王国柱 镇番人。
达奇才 凉州人。
保 定 甘州人。
李国柱 岷州人。
张显茂 凉州人。
罗一贯 甘州人。
王用予 固原人。
王承恩 西宁人。
盛 略 镇夷人。
王绍禹 西安人。
王绍勋 安庆人。
李昌龄 镇番人。
王光先 西宁人。
王孟颜 神木人。
邹宗武 陕西人。
殷国祚 三原人。
王述宗 京卫人。
石等朝 威远人。
胡有赏 满州人。

- 祁兴周 西宁人。
赵守义 榆林人。
卢拱极 永平人。
毕加生 江南人。
周成功 满州人。
常天时 辽东人。
蒋 赓 全州人。
刘大明 定远人。
边永昌 榆林人。
刘三元 河南人。
朱 标 山东人。
张元芳 山西人。
张大受 宁夏人。
刘承蒙 湖广人。
欧 升 凉州人。
赵廷葑 直隶人。
张洪印 宁夏人。
李 友 西安人。
钮鸿杰 顺天人。
李文斗 凉州人。
杨 隆 宁夏人。
高 锦 凉州人。
杨克功 灵州人。
黄正位 榆林人。
段 斌 江南人，进士出身。
钱自发
解鸣鹿 榆林人。
萧奏绍 肃州人。

伸 布 满州人。
满 仓 满州人。
永 善 满州人。

大靖守备

罗太明
刘大明
张仲才
戴加义
穆国辅
艾自升
刘文强 山东人。
尹秉衡 京都人。
窆国忠 西宁人。
曾文受 凉州人。
曹之贤 云南人，出征歿于塞外。
王继盛 甘州人。
耿 谋 山东济宁人，即捐俸掘井者，升任都司。
黄世乾 镇番人。
桂长秋 湖广人。
梁益龙 四川人。

土门守备

- | | |
|-----|------|
| 张 显 | 浙江人。 |
| 沈 璉 | 河南人。 |
| 余万荣 | 甘州人。 |
| 戴尧仁 | 江南人。 |
| 吴 豪 | 山西人。 |
| 姚 佐 | 陕西人。 |
| 唐正发 | 江西人。 |
| 范 璇 | 京都人。 |
| 鲁继东 | 凉州人。 |
| 李遇春 | 宣府人。 |
| 谭 仁 | 肃州人。 |
| 倪 俊 | 甘州人。 |
| 胡 杰 | 四川人。 |
| 陆光祖 | 四川人。 |
| 王世爵 | 满州人。 |
| 高鸿骞 | 西安人。 |
| 马增禄 | 西宁人。 |
| 陈大刚 | 肃州人。 |

安远守备

- 戴加义 甘州人。
庞开先 山东人。
马进忠 西宁人。
潘 福 靖远卫人。
董联芳 山东人。
王 贵 甘州人。
柴国梁 西安府人。
乾隆二年改设都司。

都 司

- 柴国梁 即以守备升任。
蔡 连 甘州人。
张承业 甘州人。
富 贵 镶白旗人。

古浪守备

董邦宁

劭廷臣 永昌人。

以后改设把总。

把 总

杨日盛 凉州人。

张洪仁

张一明 山东人。

康运昌 榆林人。

刘士隆 兰州人。

凌 襄 江南泰州武举。

马应河 永昌人。

苗永会 甘州人，出歿塞外，有威德，军民建祠。

段文正 肃州武生。

李 沛 武威人。

贺 元 武威人。

李文秀 武威人。

盛得王 武威人。

王德隆 甘州人。

黑松把总

- 马 骥 永昌人。
牛国英 镇番人。
袁钟祥 宁夏人。
王佐通 甘州人。
王明伏 武威人。
黄加栋 武威人。

名 宦

宦于其地，实有功德于民，不求名，自得名也。慰勉拊循，实心教养，既兴利而除弊，亦息事以宁人，古之遗爱岂可忘哉。

唐

郭 震 字元振，魏州贵乡人，嗣圣十八年为凉州都督。初，凉境不过四百里，突厥、土番岁至城下，百姓苦之。震始于南峡口筑和戎城，北磧外筑白亭军，扩地千有五百里。自是寇不敢复出。

明

- 江 享 凉州千户防守古浪，缮城障，创驿传，始属庄浪卫屯住所。
田 乐 直隶任邱人，戊辰进士，明万历二十年任甘肃巡抚。
达 云 凉州府人，历官总兵，镇守甘肃，与巡抚田乐、参议张蒲恢

复松山，开大靖、土门等地，置官设屯，民利赖之。

张蒲 河南偃师人，癸酉举人，明万历二十四年任凉州府参议。

国朝

蒋炯 江南常熟人，由进士康熙五十六年任，分守凉庄道，多惠政。时古邑并未设学，公转详请设，至今颂之。

觉罗逢泰 满州镶红旗人，庚辰进士，由翰林检讨康熙五十七年任陕西学政，时古邑尚未设学，奏准入名，古学开源于此。

张鷟 公不喜事，亦不畏事，暇则课士论文，殷勤训诲，宛若师生，以为当事所衔。甫一载解任，策蹇旋里，囊篋萧然，送者洒涕。

崔建绩 任古浪守御所，爱民如子。当军需络绎，善为抚绥，不悞公，不病民，并请开学，卫所之仅见者。

兵防志

营 堡

营堡之设，重保障也。无事则简恤士卒，有事则授兵登陴。左番右夷，俯首息喙，斯编氓安堵，并受其福矣。

大靖城 明万历二十七年，旧存东、北二面墙址，展筑计周围四百八丈，高三丈九尺，厚二丈二尺，开西、南、北三门，上起门楼三座。外城一座，高三丈五尺，周围计三百七丈，厚二丈二尺，开东、南、西门各一。

安远堡 筑建年分无考。周围计四十丈，高三丈五尺，厚一丈，开南、北门各一。

土门堡 明万历二十七年修筑。里城一座，高三丈六尺，厚二丈，周围计二百二十丈，开东、南门各一，上起钟楼一，角楼四。外城一座，高二丈五尺，厚一丈二尺，周围计二百六十五丈，开东、西门各一，上起门楼二，角楼三。池深一丈二尺，阔一丈四尺，四面共三百九十四丈。

黑松堡 筑建年份无考。周围计三百二十二丈，高三丈，厚二丈，开南、北门各一。

关隘

古称地利，端重守险，要害既得，虽强寇何从焉。故一一纪之，以示边防守御，未可一日疏也。

古浪

冲地隘口二处：

横沟口 距县西南五十里，防守兵四名。

哈西口 距县西南六十里，防守兵四名。

缓地隘口一处：

黑沟口 距县西南五十里，防守兵四名。

黑松

冲地隘口一处：

鸡冠石峡 距县西南五十五里，距黑松二十五里，防守兵五名。

缓地隘口四处：

东山龙沟口 距县南五十五里，距黑松二十里，连接平番大松山，防守兵二名。

黑沟口 西山牛头洼 皆距县西南五十里，距黑松二十里，各防守兵二名。

倒坡河口 距县西南六十里，距黑松三十里，防守兵二名。

古黑数处冲口，逼近西番，夷情好窃，于此严防，可无疏虞之患。

安远

大冲口一处：

可可口 距县西南九十里，距安远三十里，通套来川夷番住牧之地，防守兵一十名。

凡隘口独防鲁，而可可口番、鲁交冲，在万山之中，为四达之路。境外则南通西宁，北通甘州；境内则东制镇羌、岔口以达平番，西制黑松、古浪以达武威。务使隄备在我，庶番鲁闻风远遁矣。

小冲口二处：

鸳鸯池口 距县西南七十里，距安远十里，防守兵五名。

青沙湾口 距县西南七十五里，距安远十五里，防守兵五名。

大靖

冲地隘口九处：

石峡子 明沙嘴 小海子 白潦池 皆距边三十里。

青羊水 距边八十里。

十三个井 土里无素 黑牯犂湖 皆距边一百二十里。

三道咸槽 距边二百二十里。

以上九口，东通贺兰山，北达北套，西抵镇番，系夷人分道入寇之处。昔人谓于此按伏设防，不时哨瞭贼之出没，可以预知而甘宁地方，可无虞矣。诚扼要塞险之上策哉。

土门

冲地隘口二处：

黄花滩 距边三十里。

鹅头山 距边四十里。

大靖、土门边外二处隘口，在故明则套虏入寇，其地冲。我朝中外一统，其地缓，故未设兵防守。

烽 墩

烽火之传，速于置邮，非徒攘外，亦以安内，故号平安火。我朝德绥威服，平治相承，边燧之息久矣。而严巡守，谨哨瞭，安愈求安，尤在湍汛者殚心焉。

古浪南北，沿路烽墩一十四座。北自阎家腰墩起，连接张义堡汛界。南至新关滩墩止，连接黑松驿汛界。东自定宁寨起，连接土门汛界。西至旋麻湾止，连接张义堡汛界。每墩巡守兵三名。

阎家腰墩 离县四十五里。

崖头墩 离县四十里。

双塔北花腰墩 离县三十七里。

双塔北五里墩 离县三十五里。

双塔南五里墩 离县二十五里。

双塔南花腰墩 离县二十二里半。

漾沟墩 离县二十里。

杨家桥墩 离县十五里。

八里营墩 离县八里。

县北五里墩。

县南五里墩。

太平沟墩 离县七里半。

二沟墩 离县十里。

新关墩 离县十五里。

西山堡烽墩五座。

西山墩、红岭墩、红岘墩、石关墩、漫坡墩。以上五墩，俱离堡五里，

系侦探番夷冲墩，今因承平日久，各不设兵。

黑松南北，沿路烽墩十座。北自界碑墩起，连接古浪汛界；南至龙沟堡墩止，接安远汛界。每墩巡守兵三名。

界牌墩 离堡十五里。

岔路墩 离堡十二里半。

关王庙墩 离堡十里。

香筒坡墩 离堡五里。

火烧岔墩 离堡二十里半。

以上系堡北。

香沟桥墩 离堡二十里半。

板桥墩 离堡五里。

大坡墩 离堡七里半。

新墩湾墩 离堡十里。

龙沟堡墩 离堡十五里。

以上系堡南。

安远南北沿路烽墩八座。北自大沙沟墩起，连接黑松汛界；南至难泥湾止，接连连镇羌汛界。每墩巡守兵三名。

大沙沟墩 离堡十五里。

关王庙墩 离堡十二里半。

芥菜坡墩 离堡五里。

飘儿墩 离堡二里半。

以上系堡北。

流水沟墩 离堡二里半。

秤仁坡墩 离堡五里。

空心墩 离堡十里。

难泥湾墩 离堡十五里。

以上系堡南。

土门北边一道，东自土字一墩起，连接大靖汛边界，西至土字十八墩止，连接武威县治界，沿边墩台一十八座，边长五十三里九分，水栅十三处，閤门二处，每墩、栅口把守兵二名。

土字一墩至十八墩。

上罗罗墩 下罗罗墩，俱离边五里。

上梁寨墩 离边十三里。

下梁寨墩 离边十里。

以上四墩，系明境外侦探夷鲁冲墩，今缓无防兵。

青石崖 閤门一处。

永丰堡 閤门一处。

土门东西沿路烽墩四座，东自黄沙墩起，连接大靖汛界；西至圆墩止，连接古浪汛界。每墩巡守兵三名。

黄沙墩 离堡二十里。

车路沟墩 离堡五里。

胡家边墩 离堡十五里。

圆墩 离堡三十里。

大靖北边一道，东自靖字一墩起，接连平番裴家营汛边界，西至土字一墩止，接连土门营汛边界。沿边墩台一十三座，边长五十二里五分，水栅八处，閤门一处，每墩、栅口把守兵四名。

靖字一墩至十三墩。

新墩，一座，即旧志靖鲁墩。

干潦池墩，一座。

俱离边二十里。

以上二墩载旧志，系明境外冲墩，今缓无防守兵。

大靖东西沿路烽墩五处，东自沙河墩起，连接平番裴家营汛界；西至夹山岭墩止，接连土门汛界。每墩巡守兵五名。

沙河墩，离堡十五里。

二道沟墩，离堡五里。

高崖台墩，离堡十里。

麻黄沟墩，离堡三十里。

夹山岭墩，离堡五十里。

军 制

古邑逼处番鲁，一线中通，最为险要。故分设五营，互为犄角。虽五列不无多寡，要皆通强兵健卒以为声援。边烽稍警，一举响应，金汤之固，难于撼山矣。

大靖营 参将一员，中军守备一员，千总一员，把总二员，经制外委千总二员，经制外委把总二员，参将所辖。

土门营 守备一员，经制外委把总一员。

安远营 都司一员，经制外委把总一员。

古浪营 把总一员，经制外委把总一员。

黑松营 把总一员，经制外委把总一员。

大靖营 明，额马兵三百二十二名，守兵一千三百四十七名，在营马四百二十一匹。我朝宪制马战兵二百六十名，步战兵一百一十名，守兵三百三十名，共七百名。内于康熙五十七年裁拔安西镇属柳沟营马战兵五名，步战兵十二名，存营马步战守兵六百八十三名。雍正七年招募马战兵一十五名，步战兵一十五名，守兵一十五名。雍正八年，本营裁拔新设大同镇属永安营马战兵五十名，西宁镇拔补本营步战兵五十名，现存营马战兵二百五名，步战兵一百四十八名，守兵三百三十名。共马步战守兵六百八十三名，官战营马二百三十三匹。大神炮一十，马腿炮二十三，骆驼炮五，威远炮三，小炮六，子母炮八，鸟枪三百零四杆，藤牌二十面，挑刀十把，矛子三十杆，镗

耙十把，弓矢六十五副。

土门营 明，额马兵四十名，守兵三百一十名，在营马四十九匹，中军防守把总三员。内夹山岭防守一员，兵五十名；永丰堡防守一员，兵五十名。我朝顺治六年制定步守兵一百四十名，官骑自备战坐马四匹。康熙年制定马战兵二十六名，步战兵二名，守兵六十五名，官、战营马三十四匹。大神炮四，中神炮四，马腿炮六，子母炮二，小炮十，三眼枪十六杆，赞布喇鸟枪二杆，威字鸟枪五杆，红销鸟枪一杆，小鸟枪三十八杆，铁盔甲三十三顶副，绵盔甲六十七顶副，官弓一张，矛子五杆，双手袋一把，金旗二杆。

安远营 明，额马兵五十名，守兵一百五十七名，在营马五十一匹。我朝制定步守兵一百四十名，官骑自备战坐马四匹。今额设及新增马战兵三十三名，步战兵一百一十一名，守兵四十五名，官战营马三十三匹。大神炮三，勇珠炮二，马腿炮七，钩头炮三，子母炮二，铜枪十四杆，三眼枪十杆，威字号鸟枪五十三杆，小鸟枪六十九杆，马步弓四十六张，透甲箭一千一百七十枝。

古浪营 明，额马兵二十名，守兵一百三十四名，在营马二十四匹。我朝制定步守兵一百一十名，官骑自备战坐马四匹。今制马战兵二十九名，守兵九十名，官战营马三十一匹。大神炮一，勇珠炮一，马腿炮二，鸡腿炮七，子母炮二，三眼枪十二杆，鸟枪五十四杆，弓四十二张，箭一千九十枝。

黑松营 明，额马兵六十三名，守兵一百二十八名，在营马六十三匹。我朝制定步守兵七十名。今制马战兵一十五名，步战兵十六名，守兵四十名，官战营马一十七匹。大神炮一，威远炮一，小提炮五，子母炮一，小炮五，三眼枪十二杆，鸟枪三十一杆，铁盔甲十二顶副，绵盔甲五十五顶副，矛子五杆。

粮 饷

边储最为紧要，古邑设屯制赋以供军糈，无待外索，士马饱腾，盖足食所以足兵也。

大靖营 马战兵二百五名，每季人粮二石，饷银四两，四季共关粮一千六百四十石，银三千二百八十两。步兵一百四十八名，每季人粮一石五斗，银三两，四季共关粮八百八十八石，银一千七百七十六两。守兵三百三十名，每季人粮一石，饷银二两，四季共关粮一千三百一十石，银二千六百四十两。以上三项共关粮三千八百四十八石，银七千六百九十六两。官战营马二百二十三匹，春冬二季每马关料五石四斗，草三百六十束，共关料一千二百零四石二斗，草八万零二百八十束。夏秋二季每马干银三两，共银六百六十九两。

土门营 马战兵二十六名，每季人粮二石，饷银四两，四季共关粮二百零八石，银四百一十六两。步战兵二名，每季人粮一石五斗，饷银三两，四季共关粮一十二石，银二十四两。守兵六十五名，每季人粮一石，银二两，四季共关粮二百六十石，银五百二十两。以上三项共关粮四百八十石，银九百六十两。官战营马三十匹，冬春二季每马关料五石四斗，草三百六十束，共关料一百六十二石，草一万零八百束。夏秋二季每马干银三两，共银九十两。

安远营 马兵三十三名，每季人粮二石，饷银四两，四季共关粮二百六十四石，银五百二十八两。步战兵一百一十一名，每季人粮一石五斗，饷银三两，四季共关粮六百六十六石，银一千三百三十二两。守兵四十五名，每季人粮一石，饷银二两，四季共关粮一百八十石，银三百六十两。以上三项共关粮一千一百一十石，银二千二百二十两。官战营马三十三匹，每马春冬二季关料五石四斗，草三百六十束，共关料一百七十八石二斗，草一万一

千八百八十束。夏秋二季每马干银三两，共银九十九两。

古浪营 马战兵二十九名，每季人粮二石，饷银四两，四季共关粮二百三十二石，银四百六十四两。守兵九十名，每季人粮一石，饷银二两，四季共关粮三百六十石，银七百二十两。二项共关粮五百九十二石，银一千一百八十四两。官战营马三十一匹，春冬二季每马关料五石四斗，草三百六十束，共关料一百六十七石四斗，草一万一千一百六十束。夏秋二季每马干银三两，共银九十三两。

黑松营 马战兵一十五名，每季人粮二石，饷银四两，四季共关粮一百二十石，银二百四十两。步战兵一十六名，每季人粮一石五斗，饷银三两，四季共关粮一百七十六石，银一百九十二两。守兵四十名，每季人粮一石，饷银二两，四季共关粮一百六十石，银三百二十两。以上三项共关粮四百五十六石，银七百五十二两。官战营马一十七匹，春冬二季每马关料五石四斗，草三百六十束，共关料九十一石八斗，草六千一百二十束。夏秋二季每马干银三两，共银五十一两。

人物志

乡 贤

人有完行，乃称贤者，然必著奇功伟烈，斯异于乡愿者流，故录之如左，明邦光也。

明

毛 忠 字允诚，扒里扒沙人。明初，大父自武威归附，至忠屡立奇功，历升伯爵。成化戊子，固原土达满四叛，命忠往讨于炮架山。与其孙皜奋勇力战，矢尽俱死。阅弘治乙卯，孝宗追录功勋，建祠甘州，赐额“武勇”，春秋致祭。又建忠义坊。

毛 皜 忠之孙，与乃祖俱载旧志。

国朝

郭洪恩 邑监生，并子生员宗尧，顺治五年同谋剿回，众寡不侔，被执不屈，骂贼俱死。

郭宗尧 与父洪恩，俱载旧志，同入凉州乡贤。

忠 孝

行莫大乎忠孝，天经地义，足以风闻百世焉，故录之以示劝。

明

王 经 千户。

张 威 千户。

王 朝 百户。

陈 泰 百户。

徐 敏 百户。

赵 祥 百户。

以上俱系明阵亡战士，未详里居。前志载：祀本城忠节祠，今移祠忠孝祠。

严 玺 详见《劝忠碑记》。

石韞壁 详见《行孝碑记》。

国朝

赵维世 邑土门人，处士，性笃孝。父母颇严急，维世婉容愉色事之。有过则杖，长跽而未尝稍恚。遭生母丧，擗踊恸哭，口鼻出血。后事继母，一如生母。及父卧病三载，朝夕侍药，不归寝室。居丧哀毁如礼，庐墓三年，负土二里外累坟如阜。继母丧，年六十余，哀泣如孺子，不以老而废礼，寿八十一终。乾隆十年，邑令徐，详请旌表建坊，祠忠孝祠。

节 义

节烈之著，非必在世阔也。里巷幽贞，靡他之死，贤哉亦足以风世矣。

国朝

杜 氏 生员郭宗尧妻。夫死于寇，抚孤成立，呈请旌表。

张 氏 民人朱良贵妻。二十三岁而寡，孤甫数龄，度用窘迫，艰苦备尝，抚二子成立，守节四十余年而歿。

俞 氏 民人李栖凤妻。夫故。氏年二十五，茹蘖饮冰，十指艰辛，善奉姑，抚孤成立，四十余年如一日。邑令表额曰：“节孝可风”。

以上三氏，载省《通志》内，祀节烈祠。

唐 氏 故处士王璋妻。年二十七而寡，清苦自甘，教子如严父。勤劳追古敬姜，子成立，邑令王，详请旌表建坊，祀节烈祠。

张 氏 年十八归生员杨坤，二十四而寡，矢志抚幼子，竟夭。嗣以侄，复夭。又嗣侄以承夫祀。艰辛备尝，终无二志，年六十二而故。

杜 氏 民人陈世俊妻，年二十二失所夫。纺织度日以抚孤，有劝改嫁者正色拒之，子成立而卒。

王 氏 士民丁梦熊妻。乃翁笃学，氏粗闻大义，年二十五夫故。泣守二子，十指艰辛，没齿无怨言。邑令表额曰：“冰心玉性”。

李 氏 民人马化骐妻。年二十八夫远出，没于外，氏恸不欲生。以有子，立冰霜志，足迹不轻出里门，寿八十四而终。邑令表额曰：“茹荼白首”。

张 氏 士人安伦妻，年二十七而寡，之死矢靡他。一生言笑不苟，贞静可风，能教子成立。

安氏 农民朱光昱妻，夫没越三月，遗腹子生，守血允坚贞自矢。父母没，终身不归宁，识者以为合礼。

樊氏 儒童黄登科妻，二十六而寡。夫没子幼，舅姑在堂，以代终自矢，生养死葬能如礼，抚子成立而没。

贞女董氏 年一十二岁，许字刘彝，及婚远出，童养婆家，纺织勤劳，孝养翁姑。及闻婿病故口外，致丧三年，父母夺嫁，誓不改节。及翁姑年迈，氏叔又串合豪强，控守御所案下，勒逼改嫁，氏袖藏利刃，之死不二。厥后翁姑双逝，尽哀尽礼。过继族侄，教养耕读，以承夫祀。乾隆十年，邑令徐，详请旌表。

选举

举人

国朝

赵 璘 雍正丙午。

贡生

明

石韞璧 嘉靖癸卯岁贡，任山丹学训导。

杜时亨 万历拔贡，任山西寿阳县令，升云南寻甸府通判。

国朝

恩贡

李如玉 康熙壬寅岁贡，改雍正癸卯恩贡。

拔贡

李 秀 雍正甲寅。

房景龙 乾隆庚申。

岁贡

王洪廕 康熙丙寅。

王 义 癸酉洪廕子，钤凤县训导，未任卒。

卫之俊 戊寅。

韩生忠 庚子。

段 绍 乾隆己未。

尚辅玺 辛酉。

金 煥 癸亥。

杨承命 丙寅系府学。

康 寿 乙丑。

王永亨 丁卯。

例贡

杨 均 任兰州训导。

张九会

韩 俨

以上由生员。

王进礼 由俊秀。

武举

马国祯 康熙壬午。

陈大器 雍正丙午。

李 蔴 乙卯。

陈克仁 乾隆丙辰。

李 芬 辛酉。

流 寓

古志必书流寓，盖名人所至，山川若为生色。惜纪载寥寥，聊存其目，以俟将来。

文艺志

奏议

嘉漠入告，利济斯民，况在边防，尤关安危要害，则诸名臣奏议，所宜并录。

修筑紧要城堡以弥外患疏

明嘉靖二十五年，巡抚都御史杨博修筑紧要城堡，以弥外患疏曰：

议得本镇地方，斗绝羌胡之中，孤悬河湟之外，审时度势，较之沿边诸镇，独为难守。而经制长策大要，亦不出于赵充国留兵屯田，部曲相保，塹垒木樵，校联不绝之数言，盖以静制海套二虏交驰之所。前巡抚都御史赵锦深知其患，议添游兵一支，诚于地方有益。但彼时仓卒举事，虑之殊未周详，处之多欠稳妥。旧游兵往来轮戍，人犹以去亲戚离坟墓为难。今兹新兵经年在外，不得休息，以故人心厌苦。首倡罢兵之说，此处之未当一也。原议春夏驻扎凉州，秋冬驻扎庄浪。不知凉州已有分守副总兵，庄浪已有分守参将，又留游兵在彼，所谓以有用之兵置之无用之地，处之未当二也。客兵远戍，全在多方抚绥，行粮既不以时查给，月粮多被官旗侵隐，且营房未设，栖止无所，感事兴怀，归思孔切，此处之未当三也。

今日之计，补偏救弊则可，因噎废食则大不可。譬之尘垢之衣，少加瀚濯，自当一新；若四分五裂，未免竟为长物。所据裁省游击，臣实不敢轻议，以臣愚见：莫若将凉庄游击免行裁革，照依永昌游击事例，移于安远堡驻扎，东制镇羌、岔口，以达庄浪；西制黑松、古浪，以达凉州。倘遇征调，城池仍行备御，官军照旧防守，以静待动，以逸待劳，自足以坐收成算，而区区攻战之末不与焉。

臣今岁七月之初，始至镇城，深惟积谷重农第一要务，故返将屯田事宜议拟题请。其次，则缮城郭、起坞喉，谨烽隧，良不容缓。乃备行守巡兵备四道，将概镇城堡墩，通行查处。昨因八月九月农功告毕，已将甘州张钦等堡，山丹石峡口等堡，风营等墩，高台老鸦等墩，永昌明沙等墩，洪水阎王边等墩，凉州张义等堡，红城子大红石山等墩，古浪可可等墩，肃州谭家等堡，应添置者次第添置，应修饬者次第修饬。事涉琐细，不敢陈渎圣听外，但惟镇番地方，北出凉州二百余里，旷远寥阔，实与宣府独石马营相类。昔人谓于凉州北境磧中建置城垣，控其冲要，自是寇不敢复至凉州城下，即此处也。乃今风沙壅积，几与城埽，万一滑虏突至，因沙乘城，岂惟凉、永坐撤藩篱，实甘肃全镇安危所系；至于凉州、柔远、怀安、靖边亦皆番虏往来出没之所。垣墙低薄，壕堑淤塞，虽尝屡议修筑，止缘无人任事，旋议旋辍。今右参政张玺，欲于镇番添筑关厢，一则消除沙患，一则增置重险，并将修饬柔远等堡事宜，开呈前来，谋之父老，咸谓可行。质之官僚，殊无异议。急当整理。但夫役动调众多，钱粮经费浩烦，事体颇重，固非臣愚所敢擅举。如蒙乞敕该部再加查议，稍待来年春暖，土脉融和，容臣查照所议，刻期举行。未尽事宜，竟自查处。仍行参政张玺、凉州副总兵萧汉往来督视，务期一劳永逸，保障地方。事完将用过钱粮，拨过夫役，备细造册奏缴，仍行守备蔡勋往来提调，刻期完报。

裁冗贲以省滥费疏

明嘉靖二十五年，巡抚都御史杨博，议复巡按御史张坪裁冗贲以省滥费

疏，略曰：

议得制御之方，不嫌详密，兴革之际，极当慎重。且如凉庄游击一事，卒然议设，卒然议革。若以今日之革为是，则前日之设为非；前日之设为是，则今日之革为非。理贵会通，不宜悬殊。荷蒙圣明轸念边防。下臣再议，河西人士无不举手加额，以为神谋远虑，明见万里之外。

臣自渡河而西，周历凉庄之间，如古浪、黑松、安远、镇羌、岔口等处，亲见墩堡残破，耕牧废弛，行旅震惧。因备询守巡副参游守等官，咸谓此正制黑松、古浪，以达凉州；无事因聚操练，有警分布截杀。倘遇征调，城池极令备御官军照旧防守，其游击官廨，官军营房，并展修关城等项，臣先是已尝区画停当，容臣次第举行，近城荒田，听各军自行开垦，永不起科。仍将游兵除防秋时月不议外，闲暇之时，量为立班次，令其取讨衣鞋，以示休息。合用行粮草料，即于安远堡设立仓场，或派给盐引，或发银采买，委官收受，务足支用。应将月粮有妻孥在卫者，于本卫开支；无妻孥者，听分守西宁道，不拘常规，就彼议给，庶人情事体，两不相妨，实为长便。

议处增兵御鲁以安地方事

明嘉靖四十二年，巡抚都御史戴才议处增兵御鲁，以安地方事。据分守道参政王光祖呈称：

批据凉州领班都司尹继祖，及防守安远堡千户王经，各呈陈：

安远堡设在万山之中，止通一线之路，番鲁交冲，孤悬可虑，此王经所以屡屡请讨，欲增兵以壮威力也。靖边堡虽离凉州不远，然都司分管地方，利害切身，此尹继祖所以一一请明，恐减兵以致单弱也。调兵安远防御，已蒙本院许允备行，尹继祖将拨马兵五十名，并步兵五十名，即发安远堡听王经统领防御。护送经行，不许迟违。转行各官查照遵行外，随于接管卷内查得二十五年，该前巡抚都御史杨博议。将凉庄游兵免行裁革，移于安远堡驻扎，东制镇羌、岔口，以达庄浪；西制黑松、古浪，以达凉州。倘遇征调，

城池仍行备御，官军照旧防守等因，题奉钦依移驻讫。彼时番鲁宁息，地方保安，固可以为经久计也。继因番鲁住牧西海，游击兵马分布，设伏策应，往来殊无虚日，及征河东截杀数月，方得回还。而备御官军，又掣于靖边地方驻扎。三十七年据安远递运所声称：本站设立冲险，通贼适中，番鲁侵害，堵截经行。本所走递官牛，但闻声息，不敢牧放，连日困饿，实难存活。乞将备御都司兵马，发堡防守等因，该前都御史陈斐看得靖边相近凉洲，总有紧急，自可设伏。况安远站游击官厅现存，会行先任领班都司黄福，统领防御安远堡驻扎。四十年该分守道议呈，都御史胡汝霖，淮安远添设防守都司，仍掣靖边堡讫。

臣自渡河经过安远站，看得该堡地方委属冲险，今该防守官军，俱在游击领班都司部下摘拨，往往不便。今据该道议呈前因，虽经遵行，尤恐非画一之法也。事关军务，相应题请，如蒙乞敕兵部再加详议，合无将安远堡防守，王经改发靖边驻扎防御，领班都司仍移安远堡驻扎，备御番、鲁，严谨烽堠，护送经行，防范居民樵采耕牧，遇警收敛人畜，相机战守，保安地方，或怯懦债事，听臣参究治罪。其凉州游击驻扎黑松堡，专听往来策应截杀，庶官有定守，军有战志，居民有所倚赖，而地方可保守谧矣。

议古浪西川筑堡疏

明嘉靖四十五年，巡抚都御史石茂华议古浪西川筑堡疏，为添筑堡寨，阻遏番鲁，输复税粮，保全生命事。据分守道右参政姚九功呈称：

本道会同分守凉州右副总兵雷龙亲诣古浪山后西川，会勘得本川迤西一带平原荒熟水地，大约二十余里，已经开垦成熟者约十余里。特因本川西头正当番夷出没隘口，近年屡被侵扰，耕废不一；今欲当隘口之处修筑屯堡一座，以扼番夷。各军余情愿各照原种田地多寡，量出银两不等，作盐菜之资。官拨军夫筑打一堡，不动官钱，似为可举。合无行令，凉庄游兵营内量拨无马军人二百名，古浪备御军内再拨一百名，各食本等月粮外，每名日加前项盐菜银五厘。共筑中堡一座，四面共计八十丈，各高二丈，底阔一丈二

尺，收顶六尺。堞墙高七尺，底阔二尺，收顶一尺。敌台二座，大墩一座，护门台一座，瓮墙一道，堡门二层，铁裹门各一。合月城墙一道，每面三十丈，周围一百二十丈，高九尺，底阔五尺，收顶二尺，木门一层。外壕一道，口阔七尺，底阔四尺，深七尺，大约计工七十日可完。自起工日为始，除各军夫本等行粮不加外，每名日给盐菜银五厘，共银九十两，俱于李仓、樊相等见种田人户五十余家，各名下照地均出。合用夯、杵、樽木、锹、镢等类，于古浪居民内劝借，事完查给。其铁匠在于本所局匠内拨发，不支口粮；木匠并裹门铁片，亦令李仓等自行买办顾觅，俱应呈处合候详允。行令古浪所吏目宋时雍督理，上紧修筑完固，听李仓等居住。将本川宽平水地任其耕种，候三年成熟，委官丈勘明白，照收册征科，赴古浪丰盈仓场上纳。仍轮班摘拨游兵无马旗军五十名，支給本等月粮，在彼设伏，防护耕牧等因。

到臣簿查，先据古浪守御千户所纳粮，军舍余丁李仓、樊相等，各联名告称，本所原设八渠，额税不亏，自嘉靖六、七年来，遭番鲁涂炭，将西山渠田地原纳粮一百余石尽行抛弃，现存者不过二三十石，人民不得乐生，税粮不足原数，以此拖欠，不得完纳。乞于适中去处筑堡一座，拨军防御，开垦荒地，以便供税等情，已经批行分守西宁道会同分守凉州右副总兵雷龙勘议去后。

今据前因，臣惟木镇地方，孤悬河外，道路险远，本色粮草难仰给于内地，而田地本狭，出产有限，开垦荒田，修举屯政，乃经理之所宜。先者，古浪西山原系起科田地，先年地方宁谧，人得业农，屯税亦易完纳。近年以来，番鲁不时侵扰，居民日渐流徙，地土率多荒芜，以致税额减少。今据李仓等告，要筑堡拨兵，垦田供税，不惟可以开广荒田，将来有益地方，亦足以扼制番鲁，不敢非时出没。既经该道会勘明白，相应题请。如蒙乞敕该部再加查议，合无听臣督行，该道将筑堡工程，查照原议，修筑完报，令李仓等自行盖房居住。其摘拨游兵旗军防护一节，缘该营兵马数本不多，若再分散，有事不敷调遣，仍听臣行令该道招募军三十名，在彼防御，应支月粮，于古浪丰盈仓按月开支。委掌堡官一员，严谨门禁，关防出入，遇警收敛人

畜。前项募军，就令本官管理铃束，若有声息，凉庄游击添发兵马策应。其荒芜田地，尽令居民垦种，若原系起科者，候三年成熟计亩征税；原系荒地者，照例永不起科，不得一概征扰。

国朝奏议

谨题为据详恳请援例设学等事

提督陕西学政翰林院检讨臣觉罗逢泰，谨题为据，详恳请援例设学等事。

钦惟我皇上崇儒重道，寿考作人。虽遇荒僻壤，莫不砥砺诗书人文之盛，于斯为极。臣一介庸愚，荷蒙皇恩，视学陕西，于五十八年内，按考凉州，据古浪所生员韩生忠等具呈吁恳代题设学。臣随行甘肃布政司折，查议去后，今据该司详复前来，臣查凉古接界，古浪所文武童生俱附凉州卫学考试。但凉州近科人文日盛，而旧额中学并古浪所童生在内，仅取十二名，人多额少。况甘肃一路，如高台所、镇夷所，皆设有学，惟古浪一所，地广五百余里，额粮六千余石，户口蕃衍，与各所不甚相悬，现今应考童生二百余名，独未设学，似属偏枯。第建学设官祀典廩饩等项，浩繁未便。臣再查康熙四十三年，前学臣汪，题请平凉卫增取童生，拨入府学考试，部覆奉旨依议，钦遵在案。

臣谨会同督臣鄂，署甘抚臣花酌议，亦照前学臣汪题准平凉卫增取童生之例，将古浪所童生合无于岁科两试，各取八名，入凉州卫学，并该卫原额十二名，共取二十名，不必另立所学，即于卫学教官兼管。其武童亦照文童取八名，附入凉州卫学，一体考试。既省建学设官之烦，又免偏枯不均之叹。而我皇上圣泽汪洋，普天乐育，边鄙遐荒，万年永载于勿替矣。

康熙五十九年十月二十八日，题奉旨依议。

碑 记

明

定松山碑

松山延亘两河，为阿赤免等所窃据者百十年矣。明万历二十六年秋九月，巡抚甘肃兵部尚书田公谋谐帝幄，师应天弧，属鹏与西宁兵备右布政使刘敏宽、庄浪兵备按察使梁云龙、甘州兵粮分巡副使李景元、凉州粮储分守右参议张蒲，分旄五道。又署甘肃总兵都督同知达云、甘肃副总兵马应龙、凉州副总兵王铁块、镇番参将万赖、洪水镇夷凉庄游击保定徐龙、朱启来、张守信等，带甲万人，剿除兔鲁，恢复松山。宣庙略于河西，靖边烽于漠北，奏龙沙之捷，屯虎城之田，业与方召争流，名与天壤俱永。遂相与勒之琬琰，以记岁月云。

整饬肃州兵备、陕西承宣布政使司右布政司使 崔鹏谨书。树石于大靖察院。

松山平鲁碑

明万历二十六年春三月，兔鲁既平，松山底定，凉州右参议张蒲为之碑，肃凉兵备右布政司崔鹏为之序曰：

诩庙堂者必修文德，任疆场者必奋武功。武以济文，乃盛世不得已而用之者也。桀酋阿赤兔，倚松山为三窟，纠合宰僧寇五凉，自擅宜讨之罪久矣。今荧惑愈甚，早识逆鲁之衰。戊戌正统年，又犯秦关之险，时总制太子

太傅李公文运筹玉幄，巡抚兵部尚书田公乐借著金符，西宁兵备右布政使刘敏宽挥戈青海之南，又属庄浪兵备按察使梁云龙控弦乌岭之北，属甘州副使李景元率两河壮士由黄羊川，又属甘肃总兵都督同知提五郡官将于黑马圈，属西宁同知龙应坚振军旅在前，又属凉州通判使王伦挽乌粟在后。于是田公秉钺扬麾，自发令公之骑鹏等鸣弓环甲，重列冠军之营，督七校以顺天机，统六师而摇地轴。叱咤则风云是阵，张我虎队之威；战斗则草木皆兵，夺彼犬戎之魄。诛悍酋赤哈等八百级，投降番夷黄金等九千人。浑邪悬头，不啻绝居延之漠；先零落胆，岂徒留湟野之屯。三军奏凯而还，二公露布以进。朝廷嘉丕绩，赐圭封龙骧之侯；边塞勒奇勋，载笔效燕然之椽。只赖军威远畅，敢云臣力遐宣，此文臣武战之功，二百年来不数见者也。鹏敬赋诗数首，用以传信八弦已尔。

李牧安边临上郡，
田丹移节镇甘州。
人来赵垒闲金虎，
地转秦城纵火牛。
仗钺拥旄春寂寂，
投胶挟纆日悠悠。
漫言青海长传箭，
遥指黄河并运筹。

其二

都尉春耕陇麦闲，
胡儿烽起大松山。
若非睥睨燕支塞，
便是凭陵骆谷关。
雾集戈矛屯岔口，
风传鼙鼓振军颜。
从来玉帐饶奇策，
不遣匈奴匹马还。

其三

建牙吹角过边疆，
积雪警风冷战场。
元老指挥白羽扇，
中军超距绿沉枪。
剑冲月窟西追兔，
弓挽天弧北逐狼。
独倚辕门听号令，
马前先伏左贤王。

其四

桓桓虎队出车期，
漠漠龙沙奏凯时。
鲁灭全收唐土地，
兵回争拥汉旌旗。
葡萄酒冷征人醉，
苜蓿花深戍马迟。
听取琵琶弹夜月，
短箫长笛咽凉圻。

劝忠祠碑记

劝忠祠胡为而建，抚军李公为阵亡千户严公建也。公讳玺，字朝玉，其先世毫人，祖真胜从文皇北征，升凉州卫中千户所百户。父进袭职，调署双塔所事，因家焉，公以功擢前职，童时辄有大志。既冠，体貌魁梧，智勇过人，善骑射，习孙武兵法。当道器重之，署古浪所事。克尽厥职，爱恤军士，教练武勇人乐于战斗，屹然为一方保障。

古浪密迩番族，先时恒出入为患，田多荒芜，公私匱乏。公曰：足食然

后足兵，食不足何以作士气也。始垦荒田以给军饷，凿河渠以通水利。三年之后，人皆足食。更远侦探，严坼堠，斩溪隧，掘陷井，俾番人不得近我境。公屡立战功，番族畏服，且周贫恤孤，婚姻相助。凡有益于地方者，靡不为之。正德庚午，北套入寇，逼近本所，住牧抢掠。公昼夜不解甲，往来提督防御。贼觇知有备，不敢簿城。公募敢死士夜入贼营，乘怠掩击，斩馘级，夺回马牛，遂以遁去，一方保全。由是智勇著闻，当道交章荐举，以为堪任将领之重。其词曰：谋勇兼优，号令明肃，抚下有恩而军士服，却敌有勇而番人惧。位卑而名显，兵寡而功多，遂拔为甘州奇兵营千总行都指挥事。

公既为当道所知，益展布心力，修整戎务。后因鲁、番为患，安远一带道路梗涩，当道会议非公不足以保御，遂改为古浪操守兼管所事。公稔知地方险夷，伏兵要害之处，以邀击番族，自兹不敢肆毒，商旅得通，耕牧有赖。丙子秋因防送行客，追剿贼番，力战而死。当道咸痛惜之，命所司致祭营葬，厚恤其家。后会东冈李公巡抚河西，职崇激扬，闻公忠义，命度地于本堡南门外建祠，捐金助之。颜其额曰：劝忠祠。时，余滴官陕藩，分守河西，命援笔作记。是举也，考之祀典，既无不宜，而激劝之下，有关风教，岂小补哉。

正德戊寅正月吉旦，赐进士出身、承宣布政使司 晋城孟春撰。

参戎王公碑记

窃闻人臣析圭担爵，世膺朝令，当马革裹尸，以图报效于万一。予自垂髫时，习弓矢韬略事，从戎二十余年，叨沐简命，承乏大靖参将。然才埒鼯鼠，性同鸬拙，膺兹分守帅师之任，殊抱短绠深汲之虞，大都时政之所先，惟宜务实之为上。民力竭矣，深惟茧丝之难；河波厄尔敢昧衣衽之戒。大靖何地也？一墙之外，豺虎丛噪之区，山光黯淡，云气苍茫，幽窈荒凉，石田沙碛，盖西南一绝域也。不佞于崇正九年十二月内莅任，目击黄沙扑面，塞草警心，荷戈守边之士，菜色骨立；鹑衣枵腹之军，称贷无门。其困惫景象，何敢悠悠

忽忽，任其踵敝习陋，而不思所以整顿之耶？用是数年之内，唯守一切，痴肠认真实做。今姑将任内已行事款勒之于石，后之同袍君子幸勿揶揄云。

本府莅任营马仅存六十匹，请会府道汰军二百名，每月贮饷买马一十四匹。共计三年买过马三百余匹，解验骑征。

营军老弱充伍，不堪御敌，逐一查黜，节次更补壮丁七百余名，不至糜费粮饷，得以实充营伍。

鲁番窃掠为患匪小，亲赴各水头踏看地理，议筑堡寨二十六处，以便收敛人畜，使番鲁不敢窥视。

议开西门一座，打瓮城一处，以兴地利，从此内外有备。开垦酸茨沟荒地，请道院安民拨军，驻防布种，增粮百石，以资课税。

城中日用之水，搬运甚艰，厢井三眼，引河水入聚，可备鲁患。

夹山堡离水三十余里，往返劳苦，督修水窖三处，一遇雪雨，收藏可以足用。

建盖墩房一十一间，以便守兵栖住，不受风寒，瞭望有赖。

修猛雨冲倒边柞水口百十余丈，堪以阻鲁。

年来北鲁犯边，提兵对垒，大挫贼气，斩级夺马，鲁自是不敢垂涎，地方可保无虞。

统兵勤王，留蓟镇共保无虞，具呈题请，颁降河西五镇参、游、都守官员印信四十四颗，并本府钦印一颗。

捐俸建修玉皇阁，城隍庙、衙东马王殿塑像，装饰地方，永仗默佑，边疆义安。

崇祯十三年，岁次庚辰，腊月朔八日，分守大靖副总兵官 神木王孟颜立石。

孝行碑记

嘉靖丁未冬，山丹卫儒学训导石公卒于官。时，抚军杨公博重其无忝乃职，助白金给驿递夫马舁丧以归。且素闻其孝行，命琯作文以记之。

先生讳韞璧，字德辉，其先本浙东鄞人，曾祖官茂从戎和戎，因家焉。先生六岁而孤，鞠于母张氏。生而颖秀，少长即知向学。后更负笈游湟中，择师事之，得授《尚书》。越数载还凉，补博士弟子员，益励学。事母至孝，遭庶母丧，于西山下园内停柩三载，弧身庐守。猛虎时夜入，未尝遇害，以为孝感所致。性刚毅，有气概，至恤穷拯患，诸事，无不为之。尤善剖析是非，乡人推服。博览载籍，见前哲格言，必兴慨慕属文，悉抒独见，发挥无蹈陈言。徙居凉十余载，朋侪乐与游，户外受业者恒满。后复来和戎卜居。其舍旁手植奇花异卉，每出游，放情山水。累试省院不利，以嘉靖癸卯贡礼部，始授前职。至山丹，以作人励俗为念，立程限，严考课，始终不倦。生徒初惮其条教之密，既而人人乐从其化，屡为当道所称。和戎地处小隅，人多武尚。自先生崛起寻常，以读书起家，乡之人皆感奋，就业至数百人，和戎文学自此始。昔子舆氏曰：豪杰之士，虽无，文王犹兴。先生内无庭训，外无渐染，乃能立身，以扬其名，斯亦豪杰也哉！是为记。

时，嘉靖戊申仲春，后学胡琯撰。

国朝

大靖参戎边公德政碑记

大靖旧为夷牧地，明万历中，大司马田公始恢复为内境，因设官兵若干员名，而以参戎统之。盖此地控贺兰之隘，扼北海之喉，用以独当一面，而使凉镇无东北之虑者，不啻泰山之倚也。康熙十一年，当事者忽持臆议，以大靖一军移驻安远。时识者即籍籍以为不便。未几，丽泽遭创，烽火延漫，

樵苏俱废。幸赖张大将军会疏入告，复迁其兵于大靖，时康熙十九年也。

我参戎边老副台，适即莅镇于兹。公汗马血战，屡著奇功，由骑尉晋守戎，由守戎晋游府，民力资其宽恤，流亡赖以复业，至于给散官田，均分水利一事，尤为高出前人。盖官田旧为参戎养廉之资，取水于众坝，而赋税不与焉。而公竟以田散民间，水归众坝，永杜厉民之阶。如此，靖之人能不尸祝也哉！用是记公功德垂诸贞珉，以示不忘。公讳永昌，榆林人，后家武威，自公始。

岁进士王宏廌书。

增建义学记

邑令 徐思靖

古者党庠家塾，莫不择有德行者为之师。其事洒扫应对，其业礼乐诗书，其行孝友睦姻任恤，自八岁即入小学，至十有五岁而后入大学焉。盖养之于童稚之年，其天良未雕未琢，故善言易入，耒耨之子成誉髦也。

古浪旧有义学一所，在邑之东北郭。盖因有讼田者，度势不可得，以田为学资，岁入不多，供一学而未足也。余览而心动焉，择其勤业者益以膏火，而四乡之士，如黑松、安远则去邑或三四十里，或六七十里；如土门、大靖则相距并七八十里，更百有五六十里。如是而欲其以总角之年，担簦负芟以从事邑廛城关中难矣。余故曰：学不可以不广也。于是乎捐俸资、聘贤士，于土门建学，于大靖建学，于安远、黑松建学。盖尝于课桑视稼之余，单车简从，进弟子而导之，示以礼让，谏以课程。其稍通文艺者，则为之讲解论说，授以读书亲师之旨，彬彬然可观者，亦时有其一二焉。呜呼，何其难也！

记云：时过后学，则勤苦难成。又云：独学无友，则寡闻孤陋。余之设是学也，夫亦愿诸弟子之胥及其时更得便于其地，群萃州处，互相观摩，庶几不至于燕僻废学，则士风之盛，雅化之成，未必不基于此也。是为记。

捐社仓记

邑令 徐思靖

古浪社仓，前之莅是邑者，亦行之屡矣，按其籍仅得谷二石。余览而异之，以身先之捐麦七十余石。由是士民辐辏有捐至二十余石或十余石并数石者，即减至升斗，亦听其输纳，无苛求勒取之患。且听其就近藏贮，拣一二老成殷实者董之，其为数约至三千石有零，散列四乡，总其出纳。余于是忼然而言于众曰：此非创之难也，守之实难。因立五家相保之法，一家贷而不归则四家并偿，其有终不克偿者自后不得复贷。社长或一岁或二岁而更其交相代也，与有司授受等。由是春散秋敛，省其耕则籽种可以无虞，省其敛则口粮可以不乏，且水早有备，不待发仓赈粟，有往返控告，羁滞不及时之患。于是书诸坝，各贮多寡之数于右，以示来兹云。

禁革老人记

邑令 徐思靖

晋称绛县老人纪年也，汉有壶关三老纪职也。孰有职同輿隶年非耆耄，而称为老人者，乃入关以来在在有之，至军兴而后为尤甚，凡采买挽输之役，无不隶焉。按田公派，共历十二时之水地以充一年之役，有不能充者，则敛钱协助之。一坝之地，共出钱三十余贯，古邑二十余坝，则出钱将六七百贯矣。弹丸小邑，何以堪诸？且一遇采买，则领官银若干。今岁出，明岁尚不果纳，穷民利其缓也，趋之若鹜，老人则更立其求之急也。虽屡屡扣剋而不以为病，及其纳也，又往往假手于老人，辄私收以果其腹，官事大沮。思靖下车之始末之悉也，骤值供支，若非老人无以办者，迨事甫竣而深知其奸。喟然叹曰：是官蠹也，是民贼也，尚可一日留哉？爰禀诸宪革之，勒诸石以示永禁焉。

诗 歌

边诗概多商声，然古邑山川，亦多有足入品题者，行吟坐啸，谅亦骚客之所不废乎，爰汇而存之为一帙。

明

恤刑郎中陈棐闻扒沙边警

陈棐

过午风尘塞日黄，
红旗闪火甲铺霜。
龙城管有嫖姚将，
缚取扒沙台吉狼。

其 二

昨宵长矢射天狼，
顿见旄头夜少光。
投笔请缨白面事，
吉囊听报遁归忙。

甘酒石颂

古浪城南入峡十五里，道左有石，与两山脉趾弗连，屹立突起，如崇台巨屋。居人酿酸者，剉片炽入酒中，即变佳醞，因名“酸酒石”，余曰：酸酒石者，酸在酒也，因石而得甘，是甘者石之功也。乃更名“甘酒石”。古浪穷徼，自来寒苦之地，而得生养和厚之气，以嘘煦之斯，变寒苦而俾跻仁寿之域，讵止一石之甘已耶！余既学三大书刻于石上，且为之颂曰：

维石岩岩，厥德则甘。
甘性温厚，甘体滋涵。
其坚如珉，其白似玉。
玉镇天开，标兹奇躅。
甘施于物，五味斯调。
甘施于化，万类能陶。
气协沴消，人安物顺。
军食自充，军威自振。
帝施甘泽，天降甘霖。
五郡沾渥，千部讴吟。
是岂甘酒，所甘惟政。
品物呈祥，休征兆庆。
镇曰甘肃，水曰甘泉。
匪石之功，甘酒安全。
万里宁戢，一人垂拱。
四夷咸宾，皇图益巩。

嘉靖壬子岁，刑部郎中恤刑，陕西鄜陵文冈陈棐书。

谪戍御使汤鼐过古浪

汤鼐

峰回路转树苍苍，
远望平沙是战场。
地接羌胡严坼堠，
天分山堑壮封疆。
河流风度滩声急，
戍堞云来日色黄。
遥指肃州天尽处，
桑弧蓬矢志初偿。

国朝

甘酒石

陕西学使 许荪荃

片石巍然峙道边，
易名作颂到今传。
葡萄酿熟浑无羔，
此物真宜近酒泉。

古浪

许荪荃

万树清秋带夕阳，
昨宵经雨更青苍。
高山急峡蛟龙斗，
流水声中到古浪。

长 城

许荪荃

白草黄花映使袍，
晚烟残月冷空壕。
沙鸣绝漠羌村少，
山锁危楼雉堞高。
藩翰千秋原设险，
金汤万里漫云劳。
壮游拟作西征赋，
城外风雷雁正号。

天山雪歌仿岑嘉州走马川歌体

许荪荃

君不见天山雪色真奇绝，
万古青天递明灭。
翠微历历锁莓台，
丹壑苍松雪照开，
黄尘荡尽销氛埃。
销氛现景无穷已，
瑶台银阙天中起，
迢递横斜万余里。
飞花飞絮傍雕鞍，
白日重裘秋色寒，
行子长歌行路难。
路行渐入赤亭石，
阴崖百丈雪更厚，

汉月无辉边风吼。
我对天山发浩吟，
雪色时时上客襟，
山光何处悦人心。

长城下作歌

许荪荃

长城之长何蜿蜒，
北接赵魏兼幽燕。
一带固圉坚似铁，
千秋壮观耸于山。
山势周遭万余里，
长城高并青云峙。
断岭迂迴不断垣，
连天排宕还连水。
我来驱马立斜阳，
却见边城朔气黄。
陕服总非秦社稷，
番人知是汉金汤。
金汤迢迢万世利，
筑城莫道秦非智。
底似阿房巧蔽天，
骊山三百曾无地。
吁嗟筑此增秦强，
那得城长世亦长。
斜月冷烟浸濠窟，
行人搔首对边墙。

咏古浪

丁盛

开源从汉始，
辟土自初唐。
驿路通三辅，
峡门控五凉。
谷风吹日冷，
山雨逐云忙。
欲问千秋事，
山高水更长。

古浪署中喜雨

广凌 凌襄

煽虐苦骄阳，
亢旱当炎夏。
青天无点云，
赤日悬空射。
西畴土渐焦，
田苗如火炙。
粮市骤喧腾，
一日增一价。
农家举室愁，
望雨同望赦。
忽喜闻雷鸣，
甘霖随声下。

飒沓响檐牙，
昼焉继以夜。
灌溉百川平，
飞流千顷泻。
枯槁沛然兴，
秋获添禾稼。
野老迓神休，
击鼓歌豳蜡。
民以食为先，
安全感造化。

秋日晚过古浪峡

大靖监收厅 林梦鳌

傍岭沿溪出古浪，
祁连迤迳接敦煌。
霞晖淡染秋山紫，
沙迹遥添塞草黄。
云树苍茫迷客路，
边风萧飒透征裳。
萍踪翰海人千里，
落日荒原班马忙。

古浪感秋

南平 赵瑞鸿

群芳摇落起秋声，
古浪城边望晓晴。
万点霜飞因塞早，

一泓泉泻映楼清。
眼前桔柚思乡国，
头上茱萸忆弟兄。
风景苍苍音信断，
不知何处问君平。

饲蚕行

邑令 徐思靖

谁家遗来种一筐，
煦而饲之如公桑。
民间有叶不知卖，
劝他朝襴供蚕粮。
蚕当初起细于针，
一眠再眠看长成。
缲得盆丝上新轴，
挑出花纹夸缎縠。
耐得蚕娘致劳悴，
看取开絨衣满笥。

采金篇

徐思靖

谁言古浪生黄金，
黄金沙边水淋淋。
携囊裹粮通夜掘，
不可一得徒劳心。
土人摸金如粒粟，
五日不饥十日谷。
若教猛获大于拳，

夜夜开筵唱丝竹。
我今额手拜土母，
不愿多金愿多黍。
苦辛粒食无鲜民，
省穧用康吾祭汝。

初秋过古浪

题酒家壁上，佚名。相传勇健兵赴安西时作。

和戎旧迹已凋残，
古浪风高勒马看。
山似剑分双壁立，
县如斗大一城团。
潺湲秋水新澄碧，
断续疏林渐染丹。
驿路迢迢通一线，
鸳鸯池畔好盘桓。

题焉支要津

徐思靖

焉支山下水平桥，
无数皇华过使轺。
百丈彩虹萦雪练，
千重翠黛暗春樵。
孤城落照旌旗静，
古道垂杨画角调。
自为太平添景色，
筹边岂藉霍骠姚。

香林寺晚兴

徐思靖

最爱层岩一木横，
月明山顶听吹笙。
云环雪洞无人住，
留与仙家作会城。

古浪十景诗

徐思靖

天梯雪霁

祁连，即天梯山。东接终南、太白，西连葱岭，四时积雪，高不可极，河右诸郡皆见。而在县治者，玉屏耸列，南望近若几席，霁色照人，官衙似水。

天山之顶白于玉，六月披裘忘暑溽。
酸风吹雪雪成毡，大者如席神羊眠。
欲排阊阖不能致，耸身业薄青云端。
雪山宜倚作长城，莫话冰山容易倾。

鸳鸯池水色

在县属安远堡可可口外，天梯山之半，距县六十余里，约十亩，两池各色清浊划然。

我游河上之清涯，浊者为黄清者淮。
密迹重看惠山顶，清清浊浊排双井。
缘知黑白天然分，谁与好匹为同群。
太液池中梦里长，投鞭分劈两鸳鸯。

有时水里交双颈，泾渭阴阳霎时整。
濯纓濯足从盘桓，沧浪水鉴宜同看。

雷峰兴雨

安远堡西五里许，奇峰突出，俯瞰道上行人，俗名雷公山，中有雷公祠。四时常多晦色，肤寸云兴，非雷即雨，阴晴须臾，人莫能测。

乌稍岭头称极寒，雷公顶上声如湍。
兴云肤寸殷作声，崇朝偏雨开生成。
圆为车兮利为斧，心不平兮畏天鼓。
谁将信国正气歌，一一镌刻山之阿。

石峡涛声

黄羊川东南，石门排立，峡水中流。两山松涛与波声相应，琳宫绀宇更参差山麓间。峡外即大小滩、不毛山。

生平未改三峡舟，闻如天顶悬潢流。
石门之水性颇驶，飓声宁与归巫比。
地盘仄侧舟难容，空闻波浪声淙淙。
一线当中吼白龙，排山倒石愁城冲。

危岩坠险

古浪峡两山夹水，松林在南，铁柜山在北，一线西通，形胜比潼关、函谷；而道旁高崖坠石，几几乎岩覆，过者神悚。

蜀道之难过上天，我今独立秦山前。
崖崩石坠不可数，鸟径插天天与伍。
谷中仄道车马通，盘旋百折如游龙。
山下滩声险成吼，一夫当抵万夫守。

香林晨钟

香林寺对铁柜山，河东为道院，河西为禅舍。两岸钟声噌吰相应，风尘扰攘中发人深省，而香林尤蔚然深秀，比之松邱兰若云。

路旁土屋香林寺，山梁对面钟声肆。
铁柜峰凌万仞高，参差十庙红墙置。
最是山顶一木通，飞云复道难为从。
隔山尚有居民住，一片钟声挂晨树。

河桥夜月

一在县城之南，一在土门之东。烟树苍茫，庐舍掩映，仿佛湖上人家也，而河声呜咽，皆自水碓中出。至若浩月长空，清风树杪，于斯徘徊，又别是一境界。

河桥夜夜光如曙，一片苍凉动烟树。
溪光月色清成映，碧琉璃里浮明镜。
农坛红寺架山亭，成行古木阴森正。
分开百道烟霞里，月满陂田水满塍。

柏台春暮

边地无春，莺花绝少。柏台春去仍留，引人入胜。园林疏落，河水萦回，春兴无边，斯堪斟酌。

柏台之春春已暮，桃花烂漫罌花吐。
暮时谁晓柏台春，柏台知春春早沦。
岁寒正是春时节，无奈人间并不识。
但言柏影何青青，怪煞人酣我独醒。

漪泉流饮

土门沿河南行六七里，有武陵柴桑之致。山谷间漪泉出焉，细流潺潺，澄清见底，树木翳而禽鸟鸣，致足乐也。虽非兰亭胜迹，略可追美辋川。

一湾泉水出谷深，倚鞍欲息难舟行。
憩来喜得十丈地，环木阴阴足幽异。
山民饵鹰雀为脯，绿衣又见过鹦鹉。
眈此浮云半日闲，落花流水宁人间。

孤山晚照

扒沙为凉州要地。明万历中，恢复松山，五道分旄，营垒高列。孤山紧接边墙，白草黄沙，举目皆见。今值峡水南来，夕阳西下时，田总制、达元戎之威烈，足令人深长思也。

孤山落日生紫烟，牛羊下坂归陂田。
戍楼鼓角声阗阗，辕门大旆风吹偏。
缘思五道进兵日，元戎血战功成还。
从此百载狼烽恬，卸甲裹兵无控弦。

天山雪歌追和学使许生洲先生

广东雷琼道 张珫美

君不见天山巖嶽奇真绝，
雪色常明无消灭。
黄云时覆水晶屏，
长空不见一峰青，
却如高屋泻银瓶。

冰岩积翠何时已，
矫若玉龙天半起，
蜿蜒不断千余里。
昆仑直接好同看，
晴天六月逼人寒，
梯山有若上天难。
水泉西去石峡口，
万丈阴崖三尺厚，
谷鸣草堰风沙吼。
谁披鹤氅发高吟？
到此还应涤尘襟，
照人朗朗霁重阴。

黑松驿道中

张珧美

古驿山之阳，险阻扼西塞。
松阴夹道深，飞云停不得。
人家住夕阳，岚光冒黓幕。
羽骑日纷纷，屡降怀远敕。
戍卒筑防秋，荷戈出西域。
不有行者劳，安得居者息？
生男得躬耕，年年勤稼穡。
生女事女红，夜夜勤纺织。
边头新郡县，斥堠齐整饬。
豺虎远遁藏，道路无荆棘。
翩翩裘马来，放怀免偪仄。
山鸟听歌呼，赏心夫何极。

古浪峡

张昭美

西山峻极天，天高常积雪。
鸟道傍云根，山盘水亦折。
百里出峡口，风光顿悬绝。
弥望绿阴深，缘边相遮列。

凉州八景之四

甲子初秋归田作

张昭美

绿野春耕

地辟遐荒称沃野，三春力作令方东。
一犁不问沧桑事，四境初回黍谷风。
烟雨人家深树里，沟塍草色夕阳中。
归来好伴羲皇侣，击壤听歌稼穡同。

黄羊秋牧

天远河西接大荒，满川青霭恣刍场。
秋风淅沥驱黄犊，暮雨霏微乱白羊。
鸚鵡乘风搏健翮，貔貅荷櫓戍边疆。
凉州自古饶蕃息，一望弥皋地脉长。

天梯古雪

南屏一色玉弥峦，海峽归来岁未寒。
天远地荒谁共卧，烽消雨霁独相看。
坚牢不比冰山立，光洁宁随木叶残。
绵亘不毛千万里，均输田赋有桓宽。

平沙夜月

黄昏风静积沙平，素色溶溶皓魄盈。
玉露无痕沉影细，冰轮遥碾映壶清。
长城北绕白亭远，戍垒西连黑水明。
五夜边头琼宇净，不烦牛渚泛新晴。

后 记

编史修志是中华民族的优秀文化传统，长期以来经过历代修志人的不懈努力，数以万计的史志为“存史、资政、教化”发挥了重大作用，成为中华民族文化长河中的璀璨明珠，也为当地经济社会发展提供了良好的服务。

古浪县地处西北，经济文化相对落后。历史上留下的志书只有清代顺治丁酉岁（1657年）苏铎撰写的《凉镇志 古浪所志》、乾隆十四年（1749年）张绍美主持编修而成的《五凉考治六德集全志 第四卷 义集 古浪县志》和民国二十七年唐海云主编的《古浪县志》，由于受当时印刷条件的限制，这三本志书存量稀少。1993年，王建贤、周天文对《五凉考治六德集全志 第四卷 义集 古浪县志》进行校点印刷，但存书罕见。2006年，朱芳华、崔振兴、张奋武、田国治对《古浪县志》（民国二十七年）校点印刷后，2018年，由古浪县档案局再次翻印。清代《凉镇志 古浪所志》和《五凉考治六德集全志 第四卷 义集 古浪县志》几近失传，抢救保护迫在眉睫。

古浪县县志编纂办公室自2005年重新成立以来，于2011年完成了《古浪县志（1991—2007）》的编写印刷工作，2014年12月《古浪县志（1991—2007）》荣获甘肃省第九届优秀史志成果一等奖。自2012年起至今，已连续11年编辑出版《古浪年鉴》，在地情资料研究方面陆续编辑印刷了《古浪史话》等一批图书资料。今年，我办在编修《古浪县扶贫志》《古浪县全面小康志》人手紧张的情况下，委派工作人员杨先对《凉镇志 古浪所志》和《五凉考治六德集全志 第四卷 义集 古浪县志》校点整理，对原版志书中的错误和不足作以修订，改繁体竖版为简体横版，进行汇集出

版，供社会各界了解古浪、研究古浪。

由于原版志书部分页面字迹模糊，辨识难度较大，加之校点者水平有限，错误和疏漏之处难免，恳请广大读者和专家不吝赐教。

编者

2023年3月